



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 9

Army-i Kashmir nung yimjung bener marutettsü: CM Mehbooba Mufti

TAPAK 12

Marijuana bena aliba atema Heavyweight Boxer Wilder apu

VOL. XIV NO. 240 (ADOK 240)

DIMAPUR

SUNDAY

JUNE 18, 2017

5.00

Hindu convention nung 'Hindu Rashtra' tentettsü lemtet

Panaji, June 17 (Agencies): Honibarnü All India Hindu Convention-i India aser Nepal dang 'Hindu Rashtra' ta ajatsü takhangba agütsütsü telemtetba agi.

"Hindu pusemer aser India nung linük meimba teloktemi Hindu Rashtra tentettsü atema mapa inyaker. Iba mungdang nung bangzünga renemba tongti onüktem rongnung, India aser Nepal dang Hindu Rashtra ajatsüba dena liasü" ta Hindu Janajagruti Samiti lennir, Charudatt Pingale-i osangbener dang ashi.

"Telok ajak longjemtsü aser amalitepa inyaksü atema

ayongzüka 6 buba All India Hindu Convention takok nga tembangogo" ta Pingale-i osangbener senden nung metetdaksü.

India, Nepal, Bangladesh aser Sri Lanka linüktem nungi telok 132 kübok züngsem 342 tashi Ramnathi, Ponda nung anogo pezünü mungdang nung aden.

Pingale-isa ashiba agi, administrative, commercial, educational aser political wadangtem nung ozüng alema mapa inyakba anema "legal campaign" ka tenzüktsü atema mungdang nung telemtetba agi.

(Maneni tapak 12 nung)

Angami Students' Union-i aitsür



Mejangjatetba nisungtemi KYO züngsem yirutsüba noksa nung angur.

ozü züngsem dak iba mapa inyakogo, nenok sasa nenok maitsü tema nung metetdakang ta onoki tuyur, aji mesüra onoki nenok bushitsü aser timtem kar danga ajurura, iba teblemetsüji nenoki abentsü," ta ASU-isa metetdaksü.

ASU-isa yirua alir tekaratiba nung tajungba küma ang ta sarasademer aser KYO pusema nungiter, ta mendenpurtemisa ashi.

Angami nunger litsü nung terenlok mapa inyakba nung timtem agütsütsü atema nisung kari kanga meranger aser ozüng alema inyakertem nem telangzüba agütsütsü, ta Angami Students' Union-isa metetdaksü.

Talisa, Dimapur aser Kohima tsüngda tang teinyakdak 'four lane road project' nung Naga yimten teloktemi tashiyim agi sen meshia timtem agütsür. Tang ama tensa ka nung, Naga yimten teloktemi aremzüksüla aser ozüng alema mapatem meinyaksüla, kechiyong iba ajanga Naga nunger renloktsü atema inyakba mapa nung tamakok angutsü, ta ASU sangdong nungsa shia lir.

ASU-i ozüng alema inyaksangshibatem mita reprangtsü aser NCSU aser parnok den yaritepertem ajak pusema nungittsü, ta sangdong nungsa metetdaksü.

Dimapur, June 17 (TYO): June 16, 2017 nü mejangjatetba nisungtemi Kiruphema Youth Organization züngsem Vikehiekho Dahou dak teka sangshiba aitsür, ta Angami Students' Union (ASU)-i sangdong ka nung metetdaksü.

Mejangjatetba nisungtemjagi parnoki Naga yimten telok ka nungi ta shia Sp. Vikehiekho dak teka sangshiba atema aoksar aser jashir. Telungpur tenüng amer KYO aser ozü nübotem amokmerenba aser teka sangshibaji onoki magizüker aser odang metoktsütsü, ta ASU tir Visako Rino aser tongti tezülur Vizokho Zashumo sangdong nung shia lir.

"Anentsüh alua aliba tesem nung public yaritem dak iba ama mapa inyakba aitsür. Shirnoki

Kohima DC-i Officers Hill Smart Colony project tenzüktsü



June 17, 2017 nü Kohima nung smart colony tenzükba sentong nung Kohima DC, Rajesh Soundararajan den Officers Hill Youth Organisation züngsemtem külemi agiba noksa ka angur.

Kohima, June 17 (TYO): Nagaland nung tang mezüng atema Officers Hill Youth Organisation (OHYO) Kohima-i mapatong ka tenzükogo aser ibaji 'Smart Colony: GIS and 3D Map' lir.

Honibar nikongdang Hotel Urra, Officers Hill Kohima nung Kohima Deputy Commissioner, Rajesh Soundararajan-i tongti tesemdang ama shilem agia iba mapatong tenzüktsü.

Iba mapatong ya sorkar aser nübortem külemi inyakba ka lir. Iba mapatong ajanga sensotem indang address den talidak tejangja agütsütsü aser ibaji ajanga nungdakba public services timtem melii sensotem talidak

atongtsü. Iba mapatong kübok Officers Hill Kohima nung lanurtemi parnok kiyong nung aliba kilen 996 semdang aser talidak tesemtem jangjashi. Iba sülen parnoki geocode map ka yanglu aser iba nung digital address database dena lir.

Iba Zero budget project ya OHYO volunteers 18-i hopta asem tsüngda tembanga inyak.

Tanü Kohima DC Soundararajan-i mapatong tenzüktsüdang, tanü putu nung nisungtemi technology dang nungi pilaa melitetsü kechiyong asenok taküm nung iba ya tongtipang shilem ka ama kümogo, ta ashi.


Asenoki technology amshi metettsüla aser asenoki anogoshia liyonga aodang, iba teyari ajanga asen nungdaktem peridaktsütsüla, ta paisa ashi.

Officers Hill lanurtemi iba mapa inyakba atema Soundararajan-i tenüngsang agütsü aser iba ajanga lanurtemi loktiliba nung temelenshi bener arutettsü tashi lir ta kuli agütsür, ta paisa ashi.

Iba mapatong ajanga asen state renloktsü aser tejakleni aotsü atema inyakba maparen nung teyari tulu angutsü. Maneni iba ajanga smart city asoshi renemba nunga teyari tulu angutsü, ta paisa metetdaksü.

(Maneni tapak 12 nung...)

ENPO aser NTC-i asür SS Khaplang nem tetushi agütsü



Dimapur, June 17 (TYO): Eastern Nagaland People's Organisation (ENPO) aser Nagaland Tribes Council (NTC) nati Honibarnü NSCN-K mendenbuba asür SS Khaplang nem akhümtsübu aser tetushi agütsüba sentong ka ayongzüka agi.

Iba sentong ya IMC Hall, Dimapur nung agi aser nisung noklang aika adenshia asür nem tetushi agütsü.

Peace activist, Niketu Iralu-i asür SS Khaplang-i inyakba mapatem ashidang, "Khaplang-i North west Myanmar nung Naga nungertem aser Chindwin ayong tashi parnok lushu Naga nunger

asür linük den shilem ka kümduksü. Iba ya pai inyakba mapa rongnung tajungtiba ta züngshitsü akok" ta metetdaksü.

"Asür Khaplang-i pa taküm piyong bendanga agüja inyak, alizüng tulu ayu aser temulung ajak agi inyak. Pai tatensa zülua yutsüba shidi nunga, "Tsüngremi kü nem moatsüba ama ni asen nübortem nüjiso atema kü teinyaktsü inyakogo. Tang Nagaland nung lanuputui nenok den taintem yutsüba senmangji tejakleni bener aotsüla" ta shia lir" ta Iralu-isa ashi.

Sentong nung NNPGs Working Group, convenor N Kitovi Zhimomi-i yokba osang

Zopra Vero-i zünga metetdaksü "Asür SS Khaplang ji shinga dena medemdangtsü makokba 'revolutionary' lennir ka liasü aser pai Naga nunger meimba aser angatetba nung ajemdaker, pai linük tenzükba wadang nung nokdak" ta N Kitovi-i ashi.

Asür Khaplang-i shimtetba lenmang ajanga, asenoki külem nükjidong atema nangzüka aser inyakba mapatem meyipa reprangshidaksür. Onok tangatetba aser arrtsü ajanga lemsar liasü, saka onok azü kasa dang liasü. Onok ajak alizüng aser nükjidong ka ayuba Naga nunger dang liasü, ta paisa shisem.

(Maneni tapak 11 nung...)



Nü VOTE

Enoktsütettsüsa anguba nüchiso jenjangji Tongtibang temeten ka dangbo masü, Saka nai nü tarutsü tia shimtetba mapa ka lir.



Mokokchung, June 17, 2017: Honibarnü Mokokchung nung Concerned Citizen Chuchuyimpang (CCC) Chuchuyimpang Village-i sensotem atema tang mezüngbuba sangro züluba tetoktepba sentong ka ayonga kaogo. Iba tetoktepba takok angurtem-Mokokchung nungi Akumnuchet (mezüngbuba jenjang), Aizawl, Manipur nungi Imokokla Imsong (tanabuba jenjang) aser Pune nungi Imowapang Imsong (tasembuba jenjang) nung noksang nung angur. Par asem nem senpet den merit certificates agüja liasü. Iba sentong nung jembidang CCC Tir, L.Wapang Jamir-i, CCC-i sensotem kaketenozüluba aser shisaliok ajungketsütsü nükjidadong yur inyaker, ta metetdakja liasü.

Kohima nung Rev. Neiliezhü Üsou Music Award agütsü

Kohima, June 17 (TYO): June 17, 2017 nü Minister Hill Baptist Church, Kohima nung state tesem ajaklen nungi Higher Secondary School Leaving Certificate Examination 2017 nungi shimteta Rev. Dr. Neiliezhü Üsou Memorial Music Award agütsüba den külemi Minister Hill Baptist Higher Secondary school nungi toppers nem tetushi agütsüba sentong ka agiogo.

Iba sentong nung Chief Engineer PHED Nagaland, Er. Kevisekho Kruse tongti tesemdang liasü.

Iba sentong nung jembidang Er. Kevisekho-i, School ketdangsertemi Rev. Dr. Neiliezhü Üsou senmang wazüka maneni inyakba atema tenüngsang agütsü.

Pai ashiba agi, asür Rev. Dr

Neiliezhü ya taochi aketba nisung ka aser ajak yaritsü melunga aliba nisung ka liasü.

Pa ya Pastor ka dang masü saka music nunga walunir rongnung ka liasü, ta paisa metetdaksü.

Tongti tesemdangrisa, Nagaland sorkari music ya Industry ka lir, ta sangdongogo, anungji lanurtem atema kentenmenü nung maongka jenti lir, ta metetdaksü.

"Naga nung nung sempet kanga lir, ajisüaka asenoki nendaka meinyaker," ta pai tesasaba olen ka ashi.

Paisa, "Kaketshirtemi kanga meranga inyaktsüla, kechiyong asenoki meranga inyakra tajung anogotem ana nung lir," ta ayongzük.

Principal MHBHSS, Aleu Usou-ia, memorial award ya

Rev. Dr. Neiliezhü Usou nungtem nung lir, koba ajanga pai inyakba mapatem bilemtetsü aser kenten nung pai inyaktetbatem atema tetushi agütsütetsü, ta metetdaksü.

Iba award ya 2009 küm tenteta liasü, aser iba mapang nungi tenzüka küm shia High School Leaving Certificate Examination nungi topper nem iba award agütsü.

2017 küm music award ji North Field School Kohima nungi Neingusalieyano-i angu. Iba award nung senpet 15,000 den citation ka lir, aser ibaji Rev. Dr. Neiliezhü Üsou'er kinüngertemi sponsor asur.

2017 küm atema MHBHSS topper ji Elozuo M Saprana-i angu. Iba nungji senpet 40,000 lir, aser ibaji MHBHSS ketdangsertemi agütsü.

KPC lokti senden ayonger

Kohima, June 17 (TYO): Audit Committee osang Kohima Press Club (KPC)-i June 23, 2017 anüngdang 11:00 ako nungi NSF Conference Hall, NSF Office nung senden ayongzükogo; iba senden nung tongtibang onüktem nung o lemteptsü aser 2016-17 küm

agütsütsü, anungji iba senden nung züngsem ajak medema arua adentsü mepishia metetdaksür, ta tanü Kohima Press Club General Secretary, Alice Yhoshü-i sangdong ka nung metetdaksü.

Mount Mary College nung GST workshop ka agi

Dimapur, June 17 (TYO): June 17, 2017 nü Mount Mary College, Chumukedima nung GST (Goods and Services Tax) Workshop ka agiogo.

Iba sentong ya Department of Commerce, Mount Mary College-i ayongzük aser Department of Taxes, Nagaland nungi shisalen sayurtemji Deputy Commissioner of Taxes, Imosong Imsong, Superintendent of Taxes, Zulutemsu Longkumer aser Inspector of Taxes, Dimapur, B. Sangru Aier nung liasü.

Iba sentong ya Social Studies dean, P. Anungla Imsong leniba nung agi, Department of Economics nungi Suyim Lkr-i sarasadem aser college IQAC coordinator, Sentinaro-i lokti pelaa agizüka liasü.

Iba Workshop nung Imosong Imsong-i, GST ya saru inyakyim temelaba aser tekaraba ka lir, aser iba ya India linük ka, market ka, jenjang ka aser saru ka aliba linük akumtsü

nükjidadong nung lir, ta metetdaksü.

Zulutemsu Longkumer-i GST indang aser iba ya ajanga kaketshir aser tesayurtem nem tajangzük angutsü indang PowerPoint presentation ka agütsü.

Paisa, GST ya India rongsenkettsüng nung temelenshi adokdaksütsür, ta ashi.

Paisa, GST ajanga osettsüset nung jenjang ajema akümtsü, melamela shishilembatetsü aser ibaji ajanga ochimashi sen ajema akümtsü, ta metetdaksü.

Pai agütsüba presentation ji kanga junga agizüktet aser tesayur den kaketshirtemi tarutsü atema shisa kanga ngua liasü.

Mount Mary College Chairman, Dr. M. Chuba Ao-i tepela o jembia iba sentong tembanga liasü.

Iba sentong nung college nungi kaketshir aser tesayur senteper ajak agi parnok 200 shi shilem agia aden.

IPR Director-i Alongkima nung Information Center semdang



Mokokchung, June 17 (TYO): June 16, 2017 nü Director, IPR Nagaland, Limawati Ao-i Information Center Alongkima nung tang teinyakdak mapa semdanga liasü.

Pa den Registrar (IPR) Directorate, Nungshiwati aser

Information Assistant, Obed Sumi nata liasü.

Information Center nung terenlok mapa teinyakdak kanga junga inyakba ngua Limawati-i contractor dang pelaba lemsatop, ta ketdangser sangdong ka nung metetdaksü.

ADC Pfutsero-i ayonga senden amen

Dimapur, June 17 (TYO): Pfutsero sub division kübok ketdangsertem posting lemzüksüba sülen ADC Pfutsero, Zeneikhonuo Vimero-i ayongzüka June 16, 2017 nü ADC office Conference Hall nung 9th Assam Rifles, DEF, 5th NAP C. COY, SBI, Cooperative Bank, post office, DIET densema sub divisional office tem nungi tekolakpurtem coordination senden ka amen.

Iba senden nung ADC-i ketdangsertem dang, pei mapa

lemzüksüba tesem nung alitsü aser mapa kanga nendaka inyaktsü ayongzüka liasü.

Laisa ketdangsertem dang longjemer inyaktsü aser department balala tsüngda amalitepa inyaktsü ayongzük.

Iba senden nung adentsü jaokba ama adenba asoshi lai ketdangsertem dang pelaba lemsatopba den külemi parnok dang maneni amalitepa inyaktsü mepishi.

Iba senden nung tongtibang onük aika den tebilemtsü onük balala nung o lemtepa liasü.

GOVERNMENT OF NAGALAND DIRECTORATE OF SOCIAL WELFARE NAGALAND ::: KOHIMA PRESS RELEASE

This is to inform all students with disability that scholarship are provided to eligible differently-abled students under The Scholarships Schemes of Pre-Matric, Post-Matric and Top Class Education which are being implemented through the National Scholarship portal (SCP 2.0) (www.nsp.gov.in)

Timeline for Registration /Verification:

FRESH APPLICATION

Sl.NO.	Name of scheme	Student Registration Last date	Verification by Institute
1	Pre-Matric Scholarship for Students:	Between 1 st June – 30 th September	Up – to 31 st October
2	Post-Matric Scholarship:	Between 1 st June – 31 st October	Up- to 30 th November
3	Top Class Education	Between 1 st June- 31 st October	Upto to 15 th November

RENEWAL APPLICATION:

SL.NO	Name of scheme	Student Registration Last date	Verification by Institute
1	Pre-Matric Scholarship for Students:	Between 1 st June- 30 th July Of AY	Up – to 31 st August of AY
2	Post-Matric Scholarship		
3	Top Class Education:		

For more information contact Directorate of Social Welfare Nagaland Kohima. Mobile No.7085843028

Meghalaya anentsü nung nisung asem asü



Umiam, June 17 (Agencies): Umiam PS kübok Tharia yimtsüng nung tanep anentsü aluba tesem anasa alirtem taküm aser osettsüset tali samatsü nung jenboa alitsü asoshi iba tesem nungi anienogo.

State Disaster Response Force, officer incharge P H Khongsngi-i ashiba agi, anentsü aluba tesem nung aliba nüburttem asoshi tekümsükba ka mali kechiyong Meghalaya nung tzünglu aru manener, anungji iba tesem nung azü ki tilala nung lia alir nüburttem

anienogo Tang tashi nung tekümsükertemi nisung tasü mang asem ngutetogo aser ano anentsü nung yiruba nisung ka kümsükogog. "Tasürttem ya Tharia Plywood Factory nung inyakerterem lir," ta Khongsngi-i ashi.

Tasürttem ya Sh. Loba Mahanta, Smt. Babi Mahanta aser Miss Shanti Lama ta jangjaogo. Maneni Kristina Lama aser Rina Lama (tetsü aser jala) na samara tang tashi monguteti lir. Tzünglu kanga sashia aruba ajanga tekümsükba maparen

meinyakteti liasü saka tsüngsang tera tajungba küma osang agütsüba mapang tashi nungbo maparen tenzüker liasü. Osang ajanga ashiba agi, tang tashi nung parnok 9 tashi yirur lir aser parnok tenüngtemji; Sing Lama, Suresh Lama, Yam Kumar, Umesh Sharma, Seena Sharma, Lata Lama, Bunti Lama, Amita Dairy, Chandan Padmini lir. parnok rongnungi kabo NEIGRIHMS-i anir aotsü asoshi tetuyuba agütsüogog, 2 Ganesh Das Hospital aser parnok 6 Shillong, Civil Hospital nung temang anepaludar.

Tashiyim agi tetsür ka den medemba atema tebu aser jabaso aputsü akhang

Imphal, June 17 (Agencies): Imphal East, chief judicial magistrate-i director general of police L. M. Khaute nem Arif Khan (22) aser pa tebu Md. Azad Khan na aputsü asoshi tetuyuba agütsüogog. Tena ya Kwakta Khuman Maronglou nungi lir aser tang Mantripukhri nung alir. Tena ya tetsür ka tashiyim agi puer oa shi nung medemba atema aija aputsü asoshi tetuyuba agütsü.

Obendangdak ken o ji, April 29 nü tetsür la tebu Imphal police station nung ken o ka benok, kong pai ashiba agi, Arif Khan-i April 23 nü par jala la temelaba magi-i pa kinungsü kümdaktsütsü asoshi puer ao aser Arif teyari agia la meimbanga ayu.

Arif aser par kinungertem maliba mapang ka nung maongka nguteta tetsür la ya ajen aser iba ken o ya la jena arur anogo ka lir benok.

Tetsür la tenüng nung okatsür-i obendangdak ashiba agi, iba ken o ya tetsürttem anema inyakba maparen ka lir

aser tashiyim agi shi nung medemba ya aija alisang kicha-i masü saka tebu dena densema lir. Aija alirtem lokti nung talenba makai senzüdaktsüba ya ken o bushisüngdangtsü asoshi aser lokti atema tetsükdaktsü lir, ta tetsür la tenüng nung okatsürisa shisem.

Tetsür la tenüng nung okatsür-isa okadak ashiba agi, iba ken o indang IO aser temaba jenjang nung aliba ketdangsertemi temolung magütsür kechiyong tetsür la ya 'below poverty line' nung aliba kibong nungi lir.

Okatsür-i maneni obendangertem dang Md Ajad Khan aser par jabaso na tashiyim agi shi nung medemba atema aija aputsü asoshi DGP nem tetuyuba agütsütsü atema mepishe.

Tetsür lar kinungertemi IO aser ketdangsertem dang Md Ajad nem ozüng nung aliba ama tepet temerenshi agüja aputsü asoshi aiben mepishio, saka tanü tashi nung tena pua mali, ta okatsür-isa ashi.



Aizawl, June 17 : Sairang yimdak Tlawng ayong nung tzümetsüng alu manenba ajanga tzü pipe line nokdangogog aser Mongolbarnü nungi Aizwal jila nung alirtem tzü agi kanga kangshidar. Maneni Serlui aser Vaipuanpho ayong nungi Aizwal atema tzü atsüba lenmanga anentsü aluba ajanga raksatsüogog.

Asangur ka dak azükba dak sendakba nung nisung 8 puogo

Guwahati, June 17 (Agencies): Bodhbar nü asangur ka dak lokti kati azükba dak sendakba nung Brehostibar nü nungi tang tashi nung nisung 8 pua lir.

Arishi küm 25 tain Anwar Hussain-i tetsür ka mesüshiba mechi nung Lal Ganesh tesem nung lokti kati kanga pa dak mejungu azük. Iba tatalokba mapang police tem iba tesem nung liasü, saka osang ajanga ashiba parnoki ola madoki repranga dang liasü.

Mapang tatsüka lir tanga police telok kati Anwar Hussain kümsükba mozüki-i anir ao.

Anwar Hussain ya western Assam kübok Dhubri tesem nungi lir aser pa Guwahati nung gari aneshia ayaanga chiyonga alir.

"Iba ken o dak sendakba nung onoki nisung 8 pua lir aser IPC Sections 143, 325, 355 aser 303 kübok parnok anema ken o ka benokogog. Aija alirtem timba ka Lal Ganesh tesem nungi lir. Iba tatalokba sülen parnok asem

pezüka atsükadokogog aser onoki maneni item nisungtem bushidar," ta inspector Dilip Bharali-i osangbenertem dang ashi.

Kasa mapang nung police temi Anwar-i yimti nung nisung jenti nongteba aliba tesem nung mesüshilaji tang tashi mejangjateti.

"Onoki laji tang tashi shibar memetet. La tanga tesem ka nungi asütsü südi aser iba tatalokba sülen sülen la oadok asütsü. Mezüngbo aija alirtemjagi la Lal Ganesh nung alir ta ashi, saka tatsüka lir parnoki la shibar memetet ta ashi. Parnoki ashiba agi, Anwar Hussain-i tetsür ka mesüshi ta angazükba sülen tangari pa zükya aliba nung parnoka dena pa dak azük tenzü," ta Bharali-i ashi.

Paisa ashiba agi, drivers' association-i Anwar temang anepalutsü asoshi senotsü teyari agütsütsü ta par kinungertem dang nangzükogog.

GOVERNMENT OF NAGALAND

DIRECTORATE OF EMPLOYMENT, SKILL DEVELOPMENT & ENTREPRENEURSHIP

NAGALAND, KOHIMA

ADVERTISEMENT

Dated Kohima the June, 2017

NO. DET - 2/14/2001 (Pt. 1): The Directorate of Employment, Skill Development & Entrepreneurship in partnership with Maruti Suzuki Ltd. announces a **Walk - In Recruitment Drive** for Maruti Suzuki Authorised Dealer Workshop Progressive Motors in Dimapur, Kohima & Mokochung, Nagaland for the following posts.

Sl.No.	Name of the Post	Eligibility Criteria	Date of Interview	Venue
1	Service Advisor	Diploma in Mechanical Engineering/ Automobile Engineering/ Electrical Engineering / Electronics Engineering	22/07/2017	Govt. ITI Kohima
2	Technician	ITI Certificate in Mechanic Motor Vehicle / Mechanic Diesel		
3	Electrician	ITI Certificate in Electrician		
4	Welder	ITI Certificate in Welder		

Interested candidates can report for the walk in interview from **10:00 A.M** onwards with their CV/Resume with 4 latest passport size photographs and educational documents as mentioned in the eligibility criteria.

Note: Candidates with a valid driving licence will be preferred

For information & Clarification Contact:

- 9436435548 (State Govt)
- 9605282309 (Maruti Suzuki Ltd)

(MUTHINGNYUBA SANGTAM)

Director

Employment, Skill Development & Entrepreneurship
Nagaland, Kohima

Issued by: DIPR



TIR YIMYIM

YIMOBILEM (EDITORIAL)

DIMAPUR SUNDAY, JUNE 18, 2017

Oba, kanga pelar !

Tanü ya obalatem dang "kanga pelar" ta ashitsüba anogo lir. Aji oda, obalatem anogo ya obalatem asoshia pei taküm, pei jakla aser pei libaliro meyipa reprangdangba mapang tajung ka südaksütsüla. Alima nung oba ta ajaba dak tema ajatsüsa nisung shinga mali, anungji obalaji ajak dang temaba jenjang nung lir. Aji oda, ajak asoshi obalaji chuba, kibur aser tesayur. Iba ama nisung ka mali tanur ka aientsübaji aser kibong ka alitsübaji tarendaksüka aser azüngazünger. Iba jagi tanü ama tebu temeim anogo amongdang taküm alir tebutem dang nungibo asür tebutem temenungraba menungraa bilemteter. Alima nung tebu kati alima aser kibong khuret abenbaji pai dang meteta lir. Pai pa taküm dang masü saka pa kinungtsü aser par tanurtem tangar menepa akümketa lidaktsüner, iba jagi kidang kenüa anisüngzüka mamonger. Tebu ka khuretji par kibong reprangtsüba mapa kija masü saka yimten, lokti aser arogo ajak nung shilem agitsüla. Aji oda, tebu kati shilem tajung agi nung dang yimten, lokti aser arogo ajakji tashi itta aotsü. Item nungdak ajak atalokdaksünü dang tebu ka taküm nung nübo talila adoktsüsa akümer, tenla aser saru talila agütsütsüsa akümer aser tali shisabolur. Ibayongji, kibong aika nung tetsü dang nungi tebu tama alima nungi piladokba ajurutsü. Talisa chirnurtem pei tebu jakla aser inyaksangshi reprangdangra pa tejangraba aser taginüba ajak agi par chirnurtem tajung kümdaktsünüba reprangtetsü. Par chir tajung kümdaktsünüba agi, pabo küm nung süoshia kata malitsü, chia mashi den chiyongtsü aser temang nungi aliba asentsü ajak yimtema mapa inyaksü. Ajisüaka, mapa nung obala belemba mereprangtetsü. Pa aolen ajak nung pai pi rongnung pa kinungtsü aser par chirnurtem ajungba indang jembitsü. Aji oda, mejungika alinunga pa narongi pa kinungtsü aser tanurtem majungba indang jembiba manganür. Iba amaji obalai pei chirnurtem asoshi taküm ajak bendanga agüja anepaluaka, asenok chirnurtem aikati obala dang "kanga pelar" ta kena meshii obalatem aika leper nung rema toktsür asütsü. Kinungtsü aser chirnur aikati taküm alidangbo obala dang 'takidak maka, tebur masü, tangari inyaktetba meinyaktetter aser tangari bener aruba bener marutetter' ta tangar akaba memeneptet dang mezüngmeshia arütsür alitsü. Ajisüaka, tangar akaba memeneptet obala takidak makaba agi masü aser tebur masü lapi asüba agia masü saka obala ochishir asüba agi, kechiyong ochishia bendenba rongsen agibo yakta takar makümer saka "temeshipur rongsen ishika akabaji tamajunger rongsen jenti akaba dang taoba," ta Tenüngsang Ken 37: 16 nung shia angur. Tetezü ochishia bendenba rongsenji teimba- teimba küma senmang küma amshitsü saka ochimashi nungi bendenba rongsenbo asenoki repranga lia ayi ama kongadoktsü aser süngdong ama samatsü. Ibaji mangatet ser asenoki obala kanga mezüngmeshir asütsü. Aji oda, karibo pei tebu agi nümamedangteti alitsüa akok. Ajisüaka, shiba südir süang, obalaji obala. Asenoki medemer aser tembar aika shimtsü akok saka obalabo asenoki shimtsü makok, pa yabo ka dang aser paji Tsüngremi asenok den ken alitsü moatsüba taküm ka lir. Iba temoatsü aser maoangkaji angateta, asenoki obala dang 'kanga pelar' ta tebang agi ola adoka meshii lira, pa leperi maidangsa ashitsüla. Asenok aikati pei tsürabur taküm alidangbo merepranger aser mezüngmeshia amshir saka kodang südir ajep manener aser asüpila sentep nung o tajung aika ashir. Ajisüaka, ibaji amajok. Tsüraburtem dang o tajung ashitsü aser parnok dang meimtsü asoshi parnok asü matatsüla. Aji oda, tanga mapang nung obala dang kanga pelar ta meshiteti lira, tanü ya pa dang, 'oba, nü temeim asoshi kanga pelar,' ta ashitsüba mapang tajungtibaji lir. Ashiko, obala nunger karibo pei kinungtsü aser chirnurtem jashidakja alitsüa akok, kechiyong ajak kasa masü. Ajisüaka, obala tashimait den metoktepi Tsüngremi asenok dang 'odang' tai adokba ama asenoki pa dang, 'oba , onoki nü dang tai adoker aser onoki na meimer," ta ashitsü anogojia tanüsa tajungtiba asütsü. Oba, kanga pelar; Oba, onoki na kanga meimer; Oba, onoki nü dang tai adoker ta ashiba oa jagi obala tenük nungi nüktzü aludaktsütsü aser iba nüktzüji asenok ajak asoshi Obala anogo nung anguba sempet aser temoatsü tulutiba asütsü.

OLEMSABANG

OCHI NUNG AKANGA LITETBA KÜBO

- Mrs. R. Mapukala Pongentsür (Chuchuyimlang)
Merangmen, Tzürangkong

Metsü ozüi pa mapang shitak nung lepa shilang medem,
Tsüngmoka amoka tanü Obalatem anogo amongdang,
Nemjemseta, temulungjang nung tongtonglatsü atua,
Kübo akümlü temeim longraseter ani....
Ya ali nung shingaia paidoktsü mekok-ka.
Kechisarina mataloki süitema oaka, tasübajibo ajurulanglang.
Koba mapang atalokdir melenteptsü makok,
Nunga ta shiaka, ojalai asoba taküm shia-i iba anogo tenjitsüsa.

Au! Meimchir taküm shia taruba anogo ka lir
Yamaji akümlü nungi meyiba aoba mapangjia ajurur.
Terongjen Lumonger ka anü alu den ilonga ki bushi ama
Aein lima anogo ishika monger meyipa aoba den saku
Takümtem ajak kanga kara-a asü lima jagi asemteper
Pongmang ka ama asemjen-asemer,
Rongjenseta senti atang lenmang nungji kenübo jajatsüsa
Süra shiba-ibo ni maruli ta shitetsüaka!

Tanü anogo ya kübo akümlü temeim mapatem meyiba shisadanger,
temulung zürepa OBA! Nü mang ayimer.
Ochi jembitsü mekorosang, ochi nungbo tasü arema nokdak küboi,
Piyong tenem nung anü adoker ama, OBALA tesünep mulungjang,
Ajemalu, tila akümba shisatsüji nü sobutsü
Tsüngrem tsübuba ji nü meraket ta nai züngshi
Tajung dang inyaksü mulungtetsang, Tanü na ama tebu kar tanga sotetlasang!
Par chirnur semchirsepnur-a Teyanglur Tsüngremi memoatsülima!

Oh OBA! Tanübo na meliani Tsüngdangpi kongka azüng-ogo
Ki ka nung jara mali ama, kangasa sensena kümogo.....
Akümlü nung OBALA mali yabo yamai no?
taküm lenmang nung jajatsü kanga tasak akümbok maliba lenmang mesük,
Ni asoshi tsüngi o sayur mali kümadokogo ni....
Nai Tsüngrem dang nünga sarasademtsüba olabo ronui arur,
Saka asangsang nung na mali, Oh OBA, asür lima nungi na arulasang
Kü dang nü sayubentsü o tem to shilasang, koda pelala.

Tanübo nür chirnurtem nai alangzüktsüba taochi senmang nung,
Mesenseni nokdaka lir, Oba na meliaka ozüi ya shijen ashitsü,
Tsüngrem mapa nung teti bendanga agütsütsü küboi sayu,
Masetshili, ya OBALA nungi angazükba miim mapa,
Kübo-i Teyanglur mulung chia litetyong,
Akümlir-ia tatishitsü süa tetemjen tebu-a ta ajatsü nü mapa agi langogo...
Na ali shi temang Lep nung shizüka oaka, nü tsüngsü onok rongnung kodanga mesamatsü.

OH OBA ! Nü akümlü akümbok nung onok anisüngzüka lia aruogo,
Taoba anogotem menungra rongjenseta nüktzü aneter,
Akümlü tatempang Obala Ola ka kü narongi arujen arur,
Tasü itang, akümlü tongpang jenti lir, saka Tsüngrem tamadok
Tangula tatem tashi, kodaker ken tena tepela nüktzü tzüngranger,
Tebur tajung ayong külen jagi ni arung ta ajaba ola angashira ta shia amozüka aoba,
Tsüa! mepilemli ta süaka tali-ang bilemteter...
Saka OBA... Na shitak Kotak nung lir ta ni amang nung pelaseter.
KODAK NUNG AJURUDI...YISU TSÜNGDANG
AJI NÜ CHIRTEM TEIMLA....Salem-a ni OBA...

**Iba Olemsabang nung lemsaba ken-o aser shisatsü ya iba ocet zülur-i
bilemba ken-o ama tazünger-i angateta agitsü mepishir**

KÜ TEMEIM OBALA DANGI

Nü Temeim Jabaso ONENSASHI

Hauni! Ali nung alir tulur tilar ajaki Obala nem Tenüngsang agütsütsü tetemsü. Temenungratsüka! Iba tobur tajung lima nung alijak sünga tapu tapu tajung tapensa asen Teyangluri pokttdaktsü. Saka item jagi Pa mulung masü nung , item ajak madak kibur ka pai yanglu. Aser pa dang temtemjen tebu ta aja, shibai asenok mesüa indaktsü. Kibong nungi lokdi dangi aniteta nisung kümdaktsü. OBA! Nüburtemi iba lima tajung angutsü makok. Jembiaka mejembima, chuba rongsen touzük agia obala temeim madoksaka.

Anü, tzünglu, mopung tesashi arudang obala-i alu wadang maitsür, longren longpang ajak ajanga, mechi-mechimi asentzü sena kibong mesütsü pokyimsangji Obala. Ni tangar menepa kümdaktsütsü mechi takar kidang maksü arem. Tejak pakla-a tebilemba madalok kidangi shilang. Oba! Saka nai tezü medangi nüktzü ayidoker Tsüngrem den lemsatsep. Tashi itshir anepongi apuso. Takar wadang nung machi majem, terokong ajak nü subotsü aküm. Belemseta lular kidangi shilangdang chirnur ngua nü timtem amadok. Oba! Nü temeim kechi den medemdangtsü aka!

Tsüngsarusbaba li nung tzüpokdak medem Obala temeim jagi kü mulungjang süneptsür, kü nükla nung ibai kodanga mepilar, iba tebenja aser tekirak putu nung kangki khuret aser kibong khuret bener, Obala tebenjem mapang süitema akümlü wadang atemer. Ayaterm nung yipru, mopung, nikongdang taküm lendong tetsübuttsü liaka kü rongnentsü obala kü den lira ni metsübur. Lanuwa nungi alima Kotak senmang angutsü, Obalai kü dang sayu.

Arung! Obala dang sangdi, Obalaji taküm süngdong, pa tesayubaji asen tzüpokdak, shiri Obala peladaktsür parnok dak tepela tesünep lir. Tsüngremi ozü akhümdong Obala arishi talang moajangma.

Tebu Ka Akhüm

N. Imo Longkümer, CTN.

Tebu ta asüba ya akhüm taket tenüng tulu. Dictionary nunga "a title of respect" ta rateta angur. Tebur ya Tsüngremi pa mesüka yanglu, saka tetsürbo tebur temang nungi tesaret agiteta yanglu. Anungji tetsürji tebur sentsüwangshi lir, aji meimtsüla. Küm nung tanur süaka kodang nisung ka tebu kümdir paji pei kibong aja-ayangba mapa nung tongti akümer. Kanga tabensa süaka kinüngtsürtem dang tetsür tanur ta aser aiür asangur shirnok pei tsürabur madak alir, parnok dang süngo naro ta ajar. Saka tebu ka dangbo kibong tekolak ta ajar. Tebuji kibong atema tetongdang. Tebu ka shibai pei kibong akümasünga yimsü asür paji kibong nung Tsüngrem noksa. Anungji tetemjen tebu ka kübok kinüngtsü aser chirnur sadoka pelaa alir aser tebu meima akhüm tsübur. Alima nung tebu ka akhüm kanga tulu aser khuret-a tulu. Temang aser tekolak na kanga agi tekolak tilaba, saka temang rangben iba jagi anishir. Jembitsü, inyaktsü, aotsü, achitsü yamala temangi bendenba ajak tekolaki benteta inyaker.

Tesasatsüka tebu aika pei kinüngtsü aser chirnur atema tenük agi angutsü moijing küma alir. Yamala tebu pei kibongji akümlü molumi nung ayur. Tebu ka teinyaktsü memetet, chirnur atema bilema mali, kanga azümesen, awashi memetet, kinüngtsüi inyakba nung anadaker alir. Tanü asüng alu ayimer kangabo mali, asentzü meseni chiyongtsü angutsü imlar, saka Govt. terenlok mapa kecha maka nung ayangtsü lenmang mali, private sector nung ayangtsüba dang aji azümesener atema tasak.

Tongtipangsa yimtak alir tetsürtemi teperema kosüka sü ataker aser atsüki nung tsünütetba aonsotsü aser süngjanglijang yoka parnoki kibong bener aoba aika angutsü. Tebu jagi pei kibong indangji kecha memetet, kibong khuret ajakji kinüngtsüi abenba angutsü. La südak-ondak mapa den ki mapa ajak den tanur tebilemstü dena bener timtemer. Saka tebudi jibo anogoshia tangar ki sema, dokantem nung angushia anogo endokba angutsü. O lu ayimer saka par jangpong atema kecha maka. Item jagi kidang aon majungba, pai chinüba masüa ta asadenba, pai kecha bener marur sür tajung chinüba, ano yamala tebu jagi tangar machi-majemba chia jemer tepang nungi o tajung madoker saka kinüngtsü aser chirnuri memeteti sentsühbo tsüdena alir. Anungji yamala nisung dak tebu ka akhümji mali. Tebu ka akhümji kinüngtsü aser chirnuri merah kettsür.

Tebu tajungji alimai nukshir?

- Asangla Nuken Longkumer

Oba nü mapa tajung shingaia raksatsütsü aser yanglushitsütsü makok, küm süitema aodang nü ola tajung teti menungrar!

Oba alima nung akümlü wadang jajadang aiben asen teyanglur Tsüngremi asenok tendanger! Saka nai item timtem kokteta aru!

Timtem aser nuktsü ayimba aiben ajurogo südi! Oba saka nai metsübu?

Kibongtem khuret atema shisabulu aiben ajangshiaka nai kokteta liasü?

Oba asenoki mokoktetsüsa timtemyipru tulu ajuru saka nü nuk nungi nüktzü malu aremzük?

Obala ama temulung tulu ni majuru! Tsüremseta taküm tia tamajung nung jajadaksü saka temulung ajema maküm tamangi akoker ta nai ashiba mamateter!

Tatem nung teyanglur Tsüngremi takokma nung tempangtsütsü nükla tulu liasü! Yamaji teimla tulu yur ni teka nung ajok ka amer anunglen teka metonga sarasademem yim ka nung yim ka tanü obala anogo nung menungraseta arur ni?

Oh, koda tobur tajung Tsüngrem o proker tebu nungtugo sayutsüngirtem, nenok metsü koda tobur tajungtiba liasü!

Alima nung tebu tajung aika lia arugo südi, item rong nung jagi par nungtugo sayutsüngir Marthin Luther taküm ama, William Carey aser Dr. Rev. Billy Graham ama tanü alimai mamateter, obala tajung.

Obala mali, mezüng Tebutem Anogo.

Imtisangla Aier.

Viola colony, Dimapur.

Anüngtsüng sangwaa atuba ngua pelaseta, Oba,... jadanga saak!

Khen danga langzüklaa sang!

Oba,... na koloni oadok?

Aya, khen danga nü temeim jak ngulaa sang na!

Na aolen danga metet asübo!

Pilaa ogo, onok dang nungi, teti asoshi.

Aya, nüktzü netaka mulung sünep kong ali?

Akümlü nungbo joko, Oba, na munguyutsü.

Aji saka, Tamaren Obala, tushijen tushidi.

Temerüktet tabensa walunir ka, kü nükla nung teti angur,

Tatem maka kodaker lenmangi aniba tsüngnep ka kü jakdang teti lir,

Oba, item tatem maka senmang, akümlir nem nai doktsü nung Tematiba Tsüngrem nung sangdi.

Iba tetushi anogo nung, onok tsüngdang mesüaka...

nai tenyunüba Ken-tem, kodak tenyarterm den, nai shimba Khrista ,aser meima tenzükba

Kibuba matsungdang teti tatem makadak lima nung pelaseta tendangi, ta meteta mulung süngzük.

ANOGO ABEN TSÜNGREM DEN

TAMAKOK ANGUDANG TEMULUNG MAKAI MAKÜMSTÜLA

Aser pai temeshidak senji toktsür ao; aser pa oagi pei sasa soseta asü. Mathi 27:5

Taküm nung tejashitsü lendong. Tejashitsü otsü. Tejen Lai nung Saul taküm otsü bilemtetdi. Israel nung chuba asütsü mezüja shimtet, pa taküm aser tebilemba tetsübu aser tenük merem agi melenshidaktsü aser teti asoshi teraksa nung tembang. Yihuda Tsüngremi jatet. Pa Yisu tsüngsü nung jajatsü shimtet aser nütüsung ter ana rong nung dener küm 12 Yisu den jaja. Pai Yisui sayuba angashi aser sayatenya inyakba angu. Yisu Khrista leniba kübok pa medemertem den chiyongtsü lemsatsep, pelatsep aser tejashi nunga lemsatsep.

Tang Yihuda aitsüba ngur jashia sen tatsük semerji temaba putir dangi bener arua, ni tai maketba zü tokshio go ta shia temaba putir nem meypa agütsü. Temaba putir aser tamburtemi ashi, "Onok asoshi aji kechi sütsü? Aji nü sasa süang!" (t. 3-4).

Koda Yisu den aliba tembar ka iba jenjang yagi aru? Iba temenen tila ka nungi tenzük asü? Yisui asen Kibur aser Kümtetdakba ta pai mangatet asü? Pai tetsübu aser arendakba agi pa tamangji kokdaktsür asü? Mapang ajak nung Tsüngrem tembartem atsür aoe aser telungjem raksatsür. Ibai temulung raksatsü ka lir.

Asenoki tamakok nguaka, temulung makai makümtsüla. Anungji Shibaisa tamakok nguogo ta bilemer Yohani ashiba o dangi meyipang.

Father's Day tenüng nung tetsürtemi aginüba yimya khar mepia lemsateper

Purmayang Jamir

Aongza Ward Mokochung

Kinüngbur dak asangur ama bilemba shisatsü melidaktsür, mapang ajak nung naji kibong nung tebuti ka lir ta angatetba tebu ka südaktsüner. Amajok watidak mejajadaksüner, kibong khuret abenba tebuti ka südaktsüner. Telok mapa temer ki bushitsü mepilemteti nemzünembongba tebu ka mesüdaktsüner, temesepba chia ajemba kinüngbo ka mesüdaktsüner. Machimajemtsü chia jemer kima yimtung nung tangar den asatepba aser raratepa jajaba tebu ka mesüdaktsüner. Anogoshia kibok tekülem agia kinüngertem ajungshia kinüngtsü aser chirnur asoshi khuret bena sarasademtsü jangraba tebu ka südaktsüner. Maparen ajak nung tenüngsang agütsütetba kinüngbo ka südaktsüner, tongtibangsa kinüngtsür nem tenüngsang agütsüba nung atsü-ayonga maliba tebuti ka südaktsüner. Mit mebung mazüoktetitila teri ajak nung yakta kinüngtsü aser chirnur dak teka asangba tebu ka mesüdaktsüner.

Kidang kinüngtsü aser tanur den mapang peria indokba kinüngbo ka südaktsüner. Tangar tetsür/ aiür nükhia mebilemi mapang ajak nung ochishia tazüokba nung aliba kinüngbo ka südaktsüner. Sentepi oti ta ashidang tejak mekümer mit adoka jashiba yimya melidaktsüner, saka tekülem nung jangraba tebu ka südaktsüner. Kibong atema sentong balala yangluba aser inyaktsü bilemba, ajak kidang kinüngtsür den sadok-sadoka lemsatepba kinüngbo ka südaktsüner. Mapang shitak amshiba den külemi merükmejuba tebu ka südaktsüner, ki mapa, tanur anepaluba aser kiset shiruru repringtsübaji kinüngtsü mapatem dang ta mebilemi yangji kinüngbura shilem lir ta angatetdaktsüner.

Kinüngtsüji mini aser alar ama bilema amshiba, saka peibo chuba ama bilemba kinüngbo ka mesüdaktsüner. Na/nenok lendong timtem mesüra tia tamajung ajurubaji kinüngtsü-i ajurudaktsü ama mebilemdaktsüner, kinüngtsür zep ta ajetpanger aliba tebuti ka mesüdaktsüner.

Kinüngtsü aser tanur shirangdang mit adoka masü saka timi anepalua yariba kinüngbo ka südaktsüner. Kibong nungi pila ain-tsüinlen-i aodang phone nung mapangshia jembidaktsüner. Kinüngtsüi chinüba chiyongtsü metetba kinüngbo ka südaktsüner. Kodangsa aonung menur arutsüsa kümdir phone ajanga osang shioker lidaktsüner. Tenü-teku (Father/mother-in-law) aser kinüngtsür adianu meimba kinüngbo ka südaktsüner. Item ajak dak alia tongtipangsa chirnur dak atak-atem atutsüsa mesüra kibong nung azükaru malitsüsa tim masüba lenmang aser sübokrem amshia rongsen bushiba tebuti ka mesüdaktsüner ta shisa tila kati lemsatepdanger.

Obalatem anema aliba arishi anogo tajung Tulusang Tsüngremi moajangma.

OLONG PAITEP # 4455

1			2				3	4		
		5			6					7
							8			
		9								
10										
				11						
12					13					

TIPIEN

1. Tabellen aser tachiji na prongla- 6
3. Meimchir o telemsa - 4
5. Peria - 5
8. Tarutsu indang ashi - 4
9. Tai mali - 7
10. Saklok (aket) - 4
11. _ _ _ _ pangsu - 5
12. Alia - 4
13. Tai masu - 6

LANGTSÜNGLEN

1. Anu alliba mapang - 9
2. Tai/meinyaktsu mapa - 7
4. Pila - 6
6. Tejen lai ainkar ka - 7
7. Anguba aser ajitetba shilem - 9
8. Arem shiruru ka - 7
9. Inyaka ao - 6

OLONG PAITEP # 4454 TELANGZÜBA

TIPIEN :

2. Benjung, 6. Kilen, 7. Yakta,
10. Hai, 11. Tsüki, 12. Kazük,
15. Tetemsü.

LANGTSÜNGLEN :

1. Asentzü, 2. Bangchi, 3. Nok,
4. Azünger, 5. Lemtet, 7. Yimsüsü,
8. Kangshi, 9. Anünür, 13. Tasen,
14. Küm.



Yimdongjungba aser Kilungraba

Sobangba : Temba...ozü tantsü-lai kü dang teti Yimdongjungba-Kilungraba ta-sa ajar... aji kechi tetezü'ar nai rateta shiangjo...? Ni kechi'ar mangateter ako...

Alokba : Waaamaaa... na-a tanur yimdong kazür amai kechiba samesa o ajak kü dang asüngdanger akaa...??? Iba amala o yabo naia metettsüba sernung ado...

Sobangba : Ayyeeeee... temba oda mebuloshi-i kechi ashitsü'ar shiangjo... memetetba agi asüngdanger ashi, metet nung küla shibai asüngdangtsüba aka...

Alokba : Ena temba... na amai nisung karbo kima yimdong nung yi agi tera sasa pelaa mesepa jemer o tanang jembia, tangar kidang yi marok ka-yong mapa ajak inyaktsüa, aser tetenjidak mashi mashi kidang chichiyunga nemzüsü... aser kodang pei kidangi shilangdir pocket tazüng ser tiyazü English ajak jembia natzü-a napet-a molosongzü amai arr-a chirnur aser kinungtsür merenshia arur ako-dii... Iba amala nisung dangji ajar ajaa..... kima yimdong nung tangar atemabo tajung, saka pei kidangbo samesa tagidak maka nisung na amai adi...

Sobangba : Ooooh.... temba shidak-a nii...!!! Aji ni ako...!!!

Lilir : L.Kika Pongener, Aoyimkum, Dimapur.

TANÜBO NAI LANGZÜANG

Q. Shibai 2017 Bhupen Hazarika National Award naroküm agizüksü ?

- [A] Samudra Gupta Kashyap [B] Lou Majaw
[C] Yeshe Dorjee Thongchi [D] Jahnu Barua

(Taruba adok nung onoki langzüsü)

YASHI ADOK TELANGZÜBA :Neeru Chadha

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga züür, noksa (photograph - any size) ka den anogo 3 mesüra 4 jela e-mail : tryimym@gmail.com nung yokang mesüra Tir Yimym bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAIA YA METETER MA
VIRAT KOHLI-I OTSÜ TASEN KA YANGLUOGO

India nunger cricket asayar aser Captain Virat Kohli-i tawa One Day International asaya nung runs 8000 yangluteta, cricket asayar rongnung runs tekaratiba nguteter rongnung otsü tasen ka yanglutetogo. Virat-i iba alizung ya ICC Champion's Trophy asayamung nung Bangladesh den semi final asayadang 175buba innings nung nguteta liasü. Taoba mapang kasa record ya South African captain AB de Villiers-i runs 8000 ji 182 innings nung yanglua lia Virat-i ajangetetogo. Tang tashi nung runs tekaratiba 8000 tashi angurtem parnok 5 yamai alitsü: Virat Kohli-i 175 innings nung, AB de Villiers-i 182 innings nung, Sourav Ganguly 200 innings nung, Sachin Tendulkar 210 innings nung aser Brian Lara-i 211 innings nung ta ngua lir.

SUDOKU # 3567						TELANGZÜBA # 3566											
2			4	5		8			8	4	2	3	5	9	7	6	1
		9		6			4	3	1	3	7	6	8	4	9	5	2
7								1	9	5	6	2	7	1	3	8	4
5						3			6	7	9	1	3	8	4	2	5
1		7	8		9	6			5	2	3	4	6	7	1	9	8
		8			2				4	8	1	5	9	2	6	7	3
3	7		1				5	6	7	9	5	8	1	3	2	4	6
				2	8	4		9	3	6	4	7	2	5	8	1	9
4		8			5	1		2	2	1	8	9	4	6	5	3	7

OJANG LUTEP # 4062

ONKIBG :

NGNU :

UTEB :

AJUTNG :

AJKI :

MAAMNG :

UNNG :

LEMIN :

ANTESGWA :

ESMÜK :

OJANG LUTEP TELANGZÜBA # 4061
NISUNG AIKA DAK TASHI MALI MASÜ SAKA TEMELUNGTETBA SHISATSÜ MALI

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai-ar nai-a na asoba anogo ita den tanü nü tia medemdangang (Horoscope) :



Aries
21/3-19/4

Tanü sen nung kanga kümdaktsüla. Aini aotsü sentong meyanglu tajungba asütsü. Nü dang tainba kari na mepeladaktsütsü akok.



Taurus
20/4-20/5

Tanü nai telemtetba kara kara agitettsü. Nü tebilembatem tangar den melemsanütsü akok. Maparen kar nung takok angutsü akok.




Gemini
21/5-20/6

Tanü na kanga tashi itta alitsü. Jangratemtsü tensa kar ajurutsü akok. Temang nung timtem/ mokokmin kar ajurutsü akok.



Cancer
21/6-7

Tangar den tesendaktep junga ayutsü merangang. Temang kanga junga anepalutsü merangang. Tanübo aini mao tajungba asütsü.



Leo
23/7-22/8

Tanü telemtetba ajak tasü itta agiang. Nü dang tantsü tambui ashiba agitsü merangang. Nai tangari sayutsüngiba manganütsü akok.



Virgo
23/8-22/9

Tanü na sadok sadoka melitettsü akok. Nikongdang kidang mapang endoktsü merangang. Achiajemtsü marendaki chia-jemang.



Libra
23/9-22/10

Tanü na mepelatsü akok. Nü sasa nü dak temulung melemtettsü akok. Nai mapa nung tamakok aluba tangar nem tokloksütsü memerangtsüla.



Scorpio
23/10-21/11

Tanü mapa ajak kanga meilungi inyakang. Shisatsü süngjema alitsü merangang. Temoatsü tila pela agizükang.



Sagittarius
22/11-21/12

Tanü tatidang kar ajurutsü akok. Pelanüaka bilemba ama mepelatettsü akok. Nü yimya aser tebilemba memelenshitsü merangang.



Capricorn
22/12-19/1

Tanü kibong nung mangatettep kar adoktsü akok. Nai tangar dak mulung malemba ajanga tangari na sempatsü akok. Tangar dang tai adoktsü merangang.



Aquarius
20/1-18/2

Tanü ya senden nung adentsü anogo tajung asütsü. Medemer tasen kar yimtettsü akok. Nai tajung inyaktetba ajanga tangar aoksatsütsü akok.



Pisces
19/2-20/3

Tanü tapu ajak nung azüoka alitsü merangang. Tia dak temulung malem tajungba asütsü. Nai mulungteta inyakba ajanga takok angutsü.

TEMANG ANEMALIBAREN

OLIVE TOTZÜ TAJANGZÜK

- Olive totzü ya olive süngdong nung atangba süngjang nungi agizükba totzü lir. Iba totzü nung omega-6 aser omega-3 fatty acids den Vitamins E aser K. lir. Olive totzü nung aliba temo aketba acid shilem 73 dang oleic acid ajar, aser iba ya temang anema alitsü atema kanga junger. Oleic acid ya ajanga zübo aser awakba ajema kümdaktsü aser cancer dak sendakba genes ajema kümdaktsür.
- Olive totzü nung Antioxidants lir. Item antioxidants ajanga temulungjang tashidak densema tashidak tamajung aika nokdang aser aneptsür.
- Olive totzü ajemba ajanga 'stroke' asüba nokdang. Tekoloki azü aoba nung timtem, azü telong akümba mesüra azü ayimba ajanga 'stroke' asür. Study balala aika ajanga olive totzü nung monounsaturated fats aliba ajanga stroke aser temulungjang tashidak balala nokdang ta bushitetogo.
- Olive totzü ajanga low blood pressure ajema kümdaktsür. Study ka ajangabo olive totzü ajemba ajanga blood pressure atema medical teyari nungdakba shilem 48 ajema aküm, ta bushitet. Talisa extra virgin olive oil ajemba ajanga temulungjang nung teyari agütsür. Nü dak temulungjang tashidak lira mesüra tetsü/tebou nungi temulungjang tashidak lira, nü chiyungtsü nung extra virgin olive oil densema achitsüla.
- Olive totzü ajemba ajanga temang touzük timba makümer mesüra meyarar. Küm ana ser tesadang agia Spain nung college kaketshir 7000-i shilem agiba study ka ajanga, olive totzü tali ajemba ajanga temang touzük tali mekümdaktsür ta bushitet.



(Source Internet)

Q. Center sorkari nashi maleptsü ozüng latetba ya magienra, Nagaland India kübok malitsü ta Nagaland nung aliba lokti tentetemi ola adok nunga koma süla ?

Naga nunger lokti tentet ajungai sen kibur Modi anemtsüba na. Lokti tentet külen State govt. aser nüjiso bushir na külen ta sür January, February situation to agi meyipa maotsü südi?

-SMS

Iba ozüng anema Southern & North East India tesem ajunga nung lungkak aita takhangba balala Centre sokar dangi akangakanga züluba aser beef feast ayonga amongba tashi asenoki angazüker. Saka tanü tashi asen Naga nungerbo nütsüngia, leniria kati ola adokba mali nung koda sür Nagaland India kübok malitsü ta shitettsü?

-SMS

Nagaland ji alima ajunga matsüngtang menudong akümstsü, kechiyong nashishi ajanga Nagalandji India den tezüngzüktep agir Indian union nung aden masü.

-SMS

Tangari ola madokdang asenoki iba ozüng anema asenoki tama adoktsüla, kechiyong Northeast nung Naga nungerisa nashishi tesabuba asütsü.

-SMS

Asen Naga nunger India kübok nung lir, saka mali ama asen Naga nunger yamai timtemer nung, nashi melepdaktsüba atema India kübok malitsü ola adok nungbo asen Naga lima nung wara tuluka adok ama shinga mali samatsü. Anungji asen Naga nungertem naia koma bilemer, ni asoshibo nashi malepbaji kanga ajungtsü. Asenok dang tashi nung shi masü mesen dang sen tasak agi alia achir (nashishi mesüra akshi alepba jaka nung manga to bilemdangang) Asenoki kidang iba manga to arudang scü manga ta shia meindoker. Anungji manga achidang nungibo India kübok aliba tajungba.

-SMS

Kangasa ajungtsü. Good idea.

-SMS

Asenok Naga nunger-a Mizoram nunger ama nashishi benjung ka yanglu nung jungla. Ola adokba kisüng agi kecha amsütsü.

-Imti Kohima

Mezüngbuba nung Naga lima nung BJP telok ya mayutsüla. Iba sülen Town ajak nung chiyongtsü nokdangba anema yimyim agüja senzütsüla. Aji sür ang shinga kübok Naga kin malitsü ta sangdongtsüla.

-DW Jamir


India nungeri asenok nem kodanga taginüba mataloktsütsü, Asen ola ka danga züngzünga mangatsü. Anungji tanur tashi tanga ama anidaktsü dak alaka tanga lenmang mali.

-SMS

TAN HOPTA ATEMA - KOMA SÜLA ?

Q. Nagaland government nung ochimashi inyakba mapatem ajunga ya CBI nem bushisüngdaktsütsü asoshi temelaba agütsü nunga koma süla ?

Harry Potter Actor Sam Beazley süogo



Sam Beazley (File)

Iba sülen Beazley arishi küm 75 junger külen maneni film aser jiuishi balala nung shilem agi tenzük.

Pai British comedy film tem nung shilem tilala agia liasü item rongnung; "Bridget Jones: The Edge of Reason" aser "Johnny English" ano pai 2005 küm "Little Britain" episodes ana nung shilem agi aser "Midsomer Murders" o "Doctors and Casualty" nunga shilem agia liasü.

2007 küm J.K. Rowling's indang Harry Potter novel 5buba nung ajemdaker yangluba film 'The Order of the Phoenix' nung shilem agia liasü. Iba ya pa asoshi tongtibangtiba film liasü.

Iba film nung Professor Everard ama Beazley-i shilem agi aser Hogwarts School of Witchcraft and Wizardry's nung tesayurtem rongnung ajaki sapuba ka aküm. Pa shilem ya Ministry of Magic's Headquarters nung Professor Dumbledore indang office nung jara nung noksa (portrait) ka liasü. Pa masü tsüngda iba film nung shilem agitem rongnungi pa tambusang liasü.

London, June 17 (Agencies): Actor Sam Beazley, shiba 'Harry Potter and the Order of the Phoenix' nung shilem agi pa arishi küm 101 nung süogo

Iba film nung Beazley-i Professor Everard shilem agia liasü.

Actor nem tetushi agüja osang kaket ka nung yamai adoktsü: "Actor aser artist Sam June 12 nü arishi küm 101 nung mejangba mesak. Asü pila sentong June 21 nü nikonngtsütsü 2 nung 'Mortlake Crematorium' nung akatsü." Beazley ya film nung dang masü saka jilushi balala nung kanga dang takok ngua shilem agiba actor ka liasü. Pa asangwa 1930s nung-i tenzuka actor ka ama shilem agia aru, pai shilem agiba rongnung "Hamlet" aser "Romeo and Juliet" densema lir. Alima rangben rara II nung linük tenzükba sülen pa kangabo shilem magi-i 'antique shop' ka lapoker idakji küm ter metsüka inyaka liasü.

Delhi Police-i Google 2-Step Verification Scam lemsatep



zülur yoker. Ajisiäka DCP Cybercrime-i Twitter ajanga iba amala ashikülak maparen nung mashitsü asoshi kümdanga alitsü nüburttem dang metetdaksüogo.

June 17, 2017 (Agencies): 2-step verification (mesera one-time passwords) ya nisung aikati online account tem kümzüka ayutsü asoshi tekümzükbaba yimya tajungtiba ta bilemer saka mapang aben iba yimya nung kangabo temolung alemtsü mali ta jangjaogo. Au 2-step verification adena aotsü ya kanga tasak saka cyber ozüing alema iyakertemi tawa nüburttem ket nungi verification codes mesera OTP angutsü mechi nung parnok ashioktsütsü meranger.

Delhi Police cybersecurity wing ajanga nüburttem dang SMS ajanga parnok ashiokja parnok indang Google accounts OTP mesera 2-step verification code tem mejangjaba nisungtem nem magütsütsü asoshi kümdangshitsü metetdaksüogo. Item SMS tem Google nungi yokba ama kanga dang shidak amai osang kar keti ora iba ajanga parnoki nüburttem indang Google account lapoktetsü koba nung nisung ka indang mail, Google Drive file, noksa, contact aser tanga juri osangtem rizünga lir. Tawa Lt. Governor Anil Baijal-i Delhi Police-i item amala cyber ozüing alema inyakba maparen balala nokdangtsü aser renema alitsü asoshi chief technology officer ka mapai anioktsüba metetdakja liasü.



Bilbao, June 17 :- Spain, Bilbao, Palacio Euskaldun nung pro-Basque independence party EH Bildu, senden nung general coordinator Arnaldo Otegi (teyong), aser tanga party züngsemtem tangokba noksa nung angur.

OnePlus 5 phone India nung June 22 nü sayatsü



June 17, 2017 (Agencies): Taküm küm phone sayatsü alibatem rongnung OnePlus 5 smarth phone ya ajaki yongyaa ataba phone ka lir. Taoba küm OnePlus 3T aser OnePlus 3 phone tem India nung jenjang langa oset quality tajung agütsüba phone tajung rongnung densema liasü. Maneni taküm iba phone alima ajunga nung taruba hopta sayatsü aser India nunga anogo ana lir sayatsü.

OnePlus 5 phone nung Qualcomm Snapdragon 835 SoC den külemi 6GB aser 8GB Ram ta keta aliba phone tapu ana angutsü. 8GB RAM aketba smartphone India nung ayokba rongnung iba ya mezüingpur rongnung adentsü.

Company ajanga phone designbo Twitter nung sayaadokogo. Design tsütsü reprangdangra OnePlus 5 phone ya OnePlus 3T dang nungi tapuba aser talangba lir saka OnePlus 3T phone design

dang nungi kecha balaka masü aser phone ponglanglen kasa fingerprint sensor keta angutsü.

OnePlus 5 nung Apple iPhone 7 Plus, LG G6 aser Honor 8 phonetem nung ama dual-camera keta lir aser ano camera nung 'normal lens' ka aser 'telephoto lens' ka ta keta lir. Maneni iPhone 7 Plus nung 'portrait mode images' keta alitsü imlar.

Phone nung tzü aser awi mamongtsü koba tawa phone aika nung keter angur.

India nung OnePlus phone tem ayok tenzükba mapang nungi Amazon den longjemer yokdar aser iba phone tasenba yaa Amazon nungsa angutsü. Phone jenjangji sen 32,999 asütsü imlar aser 8GB RAM version yabo sen 37,999 asütsü imlar.

Company osang ajanga ashiba agi OnePlus 5 phone ya India nung June 22 nü sayatsü asoshi renema lir.

Niti Aayog-i taküm Innovation Labs 1000 bendenloktsü

June 17, 2017 (Agencies): Niti Aayog-i India ajunga nung school tem nung innovative skill tali ajungkettsü nükjidong nung taküm küm tsüngda Atal Tinkering Labs (ATL) 1000 amenoktsü, ta ketdangser kati metetdaksü. Iba ajanga ibala mesükba lab India nung 1500 shi akümtsü.

ATL tem amenokba ya tang aliba education yimya nung temelenshi ka adokdakjaa school level nungi tenzuka osettsüset tasen puraputitea amshitsü asoshi tajungshiba ka agütsütsü nükjidong nung lir, ta Niti Aayog's CEO Amitabh Kant-i ashi.

"Global innovation index nung küm ana tsüngda nung India jenjang 21buba tongtetogo. Iba lab amenokba nükjidong ya school level nungi tenzuka osettsüset tasen puraputitea amshitsü asoshi tajungshiba ka agütsütsü asoshi lir," ta Paisa ashi.

Niti Aayog, Atal Innovation Mission kübok lab tem amenoktsü asoshi private aser government school tem nungi tejangrar tem jaoka osang agütsüogo, ta pai shisem.

"Onoki taküm school 1,000 shimtsü koba yaküm den medemdangra school 457 dang shima liasü. Onok keti application tem aika arura ano

tali lapoktsü asoshi onoki molunga lir," ta Kant-i ashi.

Yaküm iba sentong asoshi application 13,000 dak tali arua liasü aser item rongnungi tetoktepba ka ajanga school 457 shimtet.

Kaketshirtem class 6 nungi 12 tashi nung azüingertem parnok sempet tali arangtetshitsü asoshi school shia nem küm 5 atema lab tem anepalutsü asoshi sen lakh 20 den külem 3D printers aser tanga osettem agütsütsü.

Maneni Niti Aayog-i 'Mentor India' ta ser sentong ka amenoktsü asoshi sentong lir, koba nung item lab tem nung lenirtemi kaketshirtem volunteer süa arua yaritsü. Iba sentong ya atalokra India nung iba ya 'volunteer mentor network' tulutiba asütsü, ta Kant-i ashi.

"Mentor India mission ajanga institution, corporates aser tanga wadang nungi innovation lenirtem hopta shia lab nung kaketshirtem yaria ghonda ishishi parnok mapang indoktsü asoshi jaoktsü," ta paisa ashi.

Item sentongtem ya India nung tzü tajemtsü temerek, aser kibong shia nung 24x7 electricity maliba tebilemstütem amala asoshi telangzübatem ngutettsü nükjidong nung amenoker, ta Kant-isa maneni shisem.

Kerala nung mezüngbuba Metro, Kochi rail service tenzükogo



Kochi, June 17, 2017: Honibarnü Kochi nung Ato kilonser, Narendra Modi-i Kerala nung mezüngbuba Metro rail tenzüksüba sülen iba Metro nung mener aoba noksa nung angur. Kasa noksa nungsa Kerala Chief Minister, Pinarayi Vijayan aser 'Metro Man' E Sreedharan nata angur.

Kochi (Kerala) June 17 (Agencies): Honibarnü Ato kilonser, Narendra Modi-i Kochi nung Kerala state nung tang mezüngbuba Metro rail lapoktsü aser state Chief Minister, Pinarayi Vijayan aser 'Metro Man' E Sreedharan na densema tongti ketdangsertem den train nung mena liasü.

Ato kilonser Modi den Union Minister Venkaiah Naidu, Kerala Angh, P Sathasivam, Kerala BJP tongti lenir, Kummanam Rajashekar, Union Urban Development Secretary, Rajiv Gouba, Kerala Chief Secretary Nalini Netto aser BJP state Tir, Kummanam Rajasekharan nungera Ato kilonser den train nungji mena liasü.

Iba sentong nung Kerala CM Vijayan-i Kochi Metro yangluba nung shilem agir ajak dang pelaba metetdaksü. Ato kilonser Narendra Modi dang pelaba lemsatepdang CM,

Vijayan-i, "Mangdang ka aliba tangbo atangji nung atalokogo," ta metetdaksü.

Tanep Modi-i Palarivattom station nung iba Metro tenzüksüba sülen pai Palarivattom nung aliba station nungi Pathadippalam nung aliba station tashi train nung mena liasü.

Kochi Metro rail tenzüksüba sentong nung jembidang Ato kilonseri, nüburtem dak rangloker yimti/jilatem nung temelenshi bener arutsü nungdak, ta metetdaksü.

Paisa, Kochi Metro Rail System nung inyaksü atema tetsür 1000 den 'enoch' 23 shimokbaji mapa tajung ka lir, ta ashi.

Ato kilonserisa, 2016 küm January ita nung Kochi ya Smart City shima liasü, aser ibaji ajanga tarutsü nung ano tajungba inyaktetsü imlar, ta ashi.

"Mapang ka nungbo

Arabian tzüyim chubatsür ta ajaba, Kochi ya 'spices' shishilembaba tiyongtsü ka liasü, saka tangbo iba yimti ya Kerala nung shishilembaba tiyongtsü ka ama züngshir," ta Ato kilonserisa ashi.

Kochi Metro Rail Limited (KMRL) yanglutsü atema Centre-i senotsü shilem 50 aser state-i shilem 50 indoka liasü.

Iba project atema tang tashi nung Centre-i sen crore 2,000 dak tema agütsüogo.

Iba project atema 2012 küm September 13 nü taoba Ato kilonser, Manmohan Singh-i lung azüngja liasü aser state nung Congress sorkar yimsüsüba mapang, 2013 küm June ita nung iba project tenzükka liasü. Ajisüaka tanü taoba Chief Minister aser Congress lenir, Oommen Chandy bo iba sentong nung maden.

Kochi Metro yangluba nung sen ajak agi crore 5,181.79 shi indokogo.

Army-i Kashmir nung yimjung bener marutettsü: CM Mehbooba Mufti

New Delhi, June 17 (Agencies): Jammu & Kashmir Chief Minister, Mehbooba Mufti-i, petsaprong aliba Kashmir nung prangpong mesüra army temi yimjung bener marutettsü, ta metetdaksü.

State assembly nung MLA tem den jembidang Mehbooba-i, "Asen sepaitemi (Jammu & Kashmir nung) taküm tenla agütsür. Petsaprong aliba Kashmir nung prangpong mesüra Army-i yimjung bener marutettsü," ta ashi.

"Tensa süngjemtsü atema lenmangji, maneni ken o jembitsü dang lir," ta laisa ashi.

Yashi south Kashmir kübok Anantnag district nung kiralongrar telok, Lashkar-e-Taiba (LeT)-i police trok tepsetba sülen anogo ka lir tanü

Jammu & Kashmir Chief Minister-i item o ya jembiogo. Tanep Srinagar nung osangbenertem den jembidang J&K DGP SP Vaid-i, yashi amakba nung aibelener kiralongrartemji aputsü, aser aibelener nem tapet temerenshi agütsütsü, ta metetdaksü.

"Bashir Lashkari leniba nung LeT-i police amak. Onoki pa bushitsü aser tim obendang agütsütsü," ta SP Vaid-i ashi.

Taoba Hokolbarnü south Kashmir, Bijbehara tesem nung Indian Army, Special Operations Group (SoG) aser Central Reserve Police Force (CRPF) sepaitem senteper LeT lenir, Junaid Mattoo den züngsem ana tepsetba sülen ibaji mangyangtsü atema kiralongrartemji police amak südi ta bilemer.



June 17, 2017 nü East Delhi kübok tesem ka nung tambur anati scü aliba 'sewer' ongen ka nungi scü oktetba noksa nung angur. Tesüba küm ana tsüngda linük nung 'latrine/sewers' nungi scü aokba mapa inyaker nisung 1268 tashi süogo. Iba mapa ya inyaksü ozüngibo memelar, ajisüaka nisung aikati iba mapa inyaka tebok mesüa alir.

Centre-i nashi tepsettsü nokdangba anema Goa sorkari shidi zülutsü

Panaji, June 17 (Agencies): Tawa Centre sorkari shiruru ayokba market nung tepsettsü atema nashi, sü aser jang ayokba mesüra aliba tenokdangba agütsüba anema tanü Goa state minister kati, Centre sorkar tetuyuba ya ajanga lisopur melungjang nung tetsübu ka aita daksüogo, ta ashi.

Iba tetuyuba ashishia Goa sorkari Centre dangi shidi zülutsü lemtetogo.

State yimtiba, Panaji nung

osangbenertem den jembidang state Agriculture Minister, Vijai Sardesai-i, "Iba onük nung ni Chief Minister, Manohar Parrikar den o lemtepdang, aser pai Centre dangi shidi zülutsü ta shiogo," ta metetdaksü.

Pais, "State sorkari iba tetuyuba nung onük kar ashishia jembitsü aser Prevention of Cruelty Towards Animal Act nung temelenshi kar atema asüngdangtsü," ta metetdaksü.

Centre sorkar tetuyuba

ajanga Goa nung melungjang nung tetsübu aita daksüogo; Goa nungeri, 'sorkari ajak nem süngolemba achirtem dang kümdaksüner' ta bilemer, ta shia Sardesai-i, "Goa nung nisung aikati nashishi achir, anungji nüburtem melungjang nung terata alibatem atema jangjashitsütsü nungdak," ta ashi.

Paisa, "Sorkari Centre dangi shidi zülutsü lemtetogo, anungji Goa nungeri shisabulutsü menüngdak," ta paisa shisem.

Naro melen kakat ang agütsütsüla: PM Modi

New Delhi, June 17 (Agencies): Ato kilonser, Narendra Modi-i mapang shia tasentasan purapiteter jembir, aser maneni Honibarnüa pai, "Narjung masü saka kakat ang ka agüjang," ta ashi.

India nung azüng-zülu metetba, literacy rate shilem 100% aliba state, Kerala nung 'Reading Month Celebration' sentong nung jembidang Ato kilonser Modi-i, "Tepela sayudang narjung masü saka kakat ang ka agütsütsü ni nüburtem dang mepishir. Ibaji ajanga temelenshi tulu adoktsü," ta metetdaksü.

"Kakat azüngba nungi jangratem anguba tepela dak alia tanga tepela mali, aser shisatsü nungi tashi tulu anguba dak alia tanga tashi tulu mali," ta paisa ashi.

Ato kilonser, Narendra Modi-isa, Kerala state nung literacy rate ajungba atema

nisung aikati tenüng agütsü temsüa lir, ta ashi.

"Kerala-i shisaliok nung takok angubaji sorkari inyakba kija ajanga masü. Sensotem aser lokti tentettemia tongtibang shilem agiogo," ta paisa ashi.

Lokti atema kakatnang (library) ji kanga tongtibang ta jembia inyaksang, PN Panicker mapatem bilemteta Modi-i nüburtem ayongzükka liasü.

1945 küm Panicker-i kakatnang 47 indang network 'Grandhasala Sangam' tenteta liasü. Tangbo iba network nung Kerala kübok jila aser yimtsüngtem nung aliba kakatnang 6,000 den timba lir.

"Kerala nung library network aser Kerala Grandhasala Sangham ji PN Panicker ajanga lir. Kasa tanela nung ni Gujarat chief minister inyakdang ni-a 'Vanche Gujarat' tenteta liasü," ta Modi-i ashi.



Pune (Maharashtra), June 17, 2017: Honibarnü Pune nung College of Military Engineering nungi Engineering Graduate Courses 'passing out' sentong nung Tir, Pranab Mukherjee lokti den külemi tangokba noksa nung angur. Kasa noksa nungsa Maharashtra state Angh, C. Vidyasagar Rao den tanga ketdangsertema angur.

Germany linük tanaben longjemdaksüba tebu Helmut Kohl süogo



Berlin, June 16 (Agencies): Cold War mapang Germany linük ana kümer lia tanaben longjemdaksüsang German chancellor Helmut Kohl, arishi küm 87 nung süogo.

Helmut ji Ludwigshafen

nung par kidang lia Hokolbarnü asü.

"Taküm ka tembangogo aser iba nisung indang otsü ya putiotsü nung teti alitsü. Helmut Kohl ji German nungger tajung ka aser European nung tajung ka liasü" ta German Chancellor, Angela Merkel-i ashi.

1982 nungi 1998 tashi asür Helmut-i Germany linük nung küm 16 tashi ketdangsüa arudang, pai mezüing West Germany atema inyaker aser iba sülen united Germany atema inyaka liasü.

1989 November ita Berlin Wall chirepba sülen pai Germany nung East aser West

telesa aliba longjemtsü atema mapa inyaker aser iba ajanga European politics nung putu tasen ka bener aru.

Kohl-i alima lennirtem den tesentaktep tajung yangluba ajanga Germany-i kidanger linüktem den yimjung nung litettsüsa tensa yanglu.

"World War II sülen European yimten yimsüsür tongtipangji Helmut Kohl liasü. Par mapang nung Kohl-i Germany, Europe, United States aser alima tarutsü atema telangzüba shitak agütsü" ta taoba US tir Bill Clinton-ia metetdaksü.

Külen, taoba U.S. tir George

H.W. Bush-ia ashiba agi, alimai nüjiso indang medemer chichiba ka akoksaogo.

"Cold War yimjung nung tembangtsü atema ni pa den külemi mapa inyaker. NATO sasep nung Germany longjemtsü atema mapa inyaker kü atema tepela mapangtem rongnung ka liasü. Künati külemi mapa inyaksangshidang, Helmut ji tashitait lennir ka liasü" ta George Bush-ia ashi.

US tir Donald Trump-i ashiba agi, "Kohl ji United States atema medemer aser teyariteper ka liasü. Küm 16 tashi pai Federal Republic of Germany ketdangsüa aru. Pa ya German longjemba atema tebu ka dang masü saka Europe

aser trans-Atlantic tesentaktep atema inyaker ka liasü."

"Pa indang alizüing aser mapa ajanga alima ajangzüokogo. Pa toktsür aoba senmang teti taküm alitsü" ta Trump-isa metetdaksü.

Russia tir Vladimir Putin-ia Kohl nem tenüngsang agüja ashiba agi, pai Cold War anendaksü aser Germany tanaben longjemdaksü.

Helmut Kohl ya euro currency atema tashi agütsür ka liasü. Pai Europe linüktem longjemtsü atema French President Francois Mitterrand den tesentaktep tajung ayu.

Pa 2008 nungi temang mejungi kümer wheelchair nung dang anepalua aru.

Philippine army-i Islamist kiralongrartem amak

Marawi, June 17 (Agencies): Honibarnü Marawi nung Philippine sepaitemi Islamist kiralongrartem amak aser iba yimti nung sepaitemi talila mapa lemzüksüogo.

Malawi nung ita ka jungnüa khatepa arudang nisung 300 shi süogo.

Tanü Philippine air force ajanga anünglen nungi kiralongrartem jenoka alidak amak aser iba mapang ali nung sepaitemi kiralongrartem mendanga aliba tesemtem amak, ta AFP journalists-i ashi.

Tanü MG520 attack helicopters aser FA50 fighter jets amshia rara, ta osangbenertemisa ashi.

Hopta ka shi sülen Philippine tir Rodrigo Duterte-i tan mezüing atema yimjak nung o jembidang, Marawi nung Islamic State (IS) nung bendanger rarartem aliba ajanga rara nung timtem ajurur, ta ashi.

"Marawi nung Syria, Indonesia, Malaysia, Sri Lanka aser Arab nungger kiralongrartem lir. Onoki tayimtsü amshia rarar kechiyong Middle East nungi kiralongrartem lir. Parnoki taochi kecha melii dang mapa inyaker aser parnok nenok rongsettsü, tekolak atangtsü" ta Butuan city nung sepaitemi tesep ka

sem dang Duterte-i ashi.

Tanü Philippines tiyongtsülen nungi sepaitemi 400 tayimtsü ajanga Marawi-i anir ogo, ta ANC television-i metetdaksü.

May 23, 2017 nü Philippines nung Muslim nungger atema tongti yimti Marawi nung Islamic State (IS) wako amba telungpurtemi yimti makdoksü merang.

Iba anema tir Duterte-i Mindanao nung 'martial law' alitsü tetuyuba agütsü aser pai ashiba agi IS-i par linük nung tesep ka tentetnüba atema iba mapa inyaker.

Southeast Asia nung parnok yimsüsüba menden ka tentettsü atema IS-i tesep ka nungdaker, ta mongin nisungtemia ashir.

Marawi yimti nung raraba nung Chechnya, Yemen, Malaysia aser Indonesia linüktem nungi kiralongrar 8 tashi tepsetogo, ta army osang ka ajanga ashi.

Tang tashi nung nisung 329 süogo aser parnok rongnung kiralongrar 225, sepaitemi 59 aser civilians 26 liasü.

Iba rara ajanga pei talidak toktsür aoertem nungia nisung 19 tashi asü. Parnokji tzü mengui timtemba aser satsüpokshi ajanga asü, ta governor Mujiv Hataman-ia metetdaksü.

Egypt nungger 31 nem tasüba temerenshi agütsü

Cairo, June 17 (Agencies): Honibarnü Cairo criminal court kati Egypt nung taoba former attorney general tepsetba atema nisung 31 tasüba temerenshi agütsütsü tetuyuba agütsü.

July 2013 nung Tir Abdel Fattah el-Sisi-i Mohamed Morsi atsüngdoker attorney general inyaksü atema Hisham Barakat shim aser June 2015 nung pa tepset, ta osang ka ajanga ashi.

Parnok nisung 31 ji nisung tepsettsü tasa atongba, kiralongrar telok nung züingsem asüba, bendanger kiralongrar telok nung adenba, tapoktsü

yangluba, ozüing alema arrtsü adena aoba aser itdangitriba onüktem nung tai tongloksü.

Okadakisa parnokji Muslim Brotherhood den tesentaktep lir ta tai tongloksü. Iba telok ya Egypt sorkari kiralongrar telok ka ta züingshir.

Iba oshidangji Egyptian Mufti dangi abentsü. Pa ya Islamic shisashir aser ozüing nung mongin ka lir, saka pai shidangba o jagi okadaki telemtetbabo menembangtet.

July 22, 2017 nü iba ken o atema tatembang obendang agütsütsü.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA

NOTIFICATION

Dated Kohima, the th June 2017.

NO.DET-7/20/2001 (Vol-V): 453 The result of All India Trade Test held from the month of February- March, 2017, at Government Industrial Training Institutes, Kohima, Mokokchung and Tuensang, is hereby declared and the Roll Numbers of successful Candidates are given below: -

Govt. ITI	Pattern	NCVT/SCVT	Roll Numbers
1. Kohima	Conventional Repeater	SCVT	Km- 02R1, 13R1, 16R1, 29R1, 34R1, 36R1, 39R1, 68R1, 43,82R1, 85R1, 86R1, 88R1, 90R1, 104R1, 105R1, 109R1, 110R1, 111R1, 112R1, 119R1.
	1 st Semester Regular	NCVT	00160813000023, 00160813000028, 00160813000030, 00160813000031, 00160813000034, 00160813000043, 00160813000044, 00160813000045, 00160813000046, 00160813000047, 00160813000048, 00160813000050, 00160813000051, 00160813000052, 00160813000053, 00160813000054, 00160813000055, 00160813000056, 00160813000060, 00160813000062, 00160813000063, 00160813000064, 00160813000065, 00160813000066, 00160813000080, 00160813000083, 00160813000086, 00160813000087, 00160813000089, 00160813000090, 00160813000091, 00160813000092, 00160813000105, 00160813000106, 00160813000109, 00160813000114, 00160813000115, 00160813000119, 00160813000131, 00160813000134, 00160813000137, 00160813000139, 00160813000141, 00160813000142, 00160813000144, 00160813000146, 00160813000147, 00160813000148, 00160813000149, 00160813000151, 00160813000152, 00160813000159, 00160813000166.
	1 st Semester Repeater	NCVT	00140813000086, 00140813000153, 00150813150814, 00150813150819, 00150813150823, 00150813150824, 00150813150826, 00150813150830, 00150813150833, 00150813150834, 00150813150835, 00150813150838, 00150813150839, 00150813150840.
	2 nd Semester Repeater	NCVT	00140813000069, 00140813000086, 00140813000088, 00140813000090, 00140813000099, 00140813000155, 00140813000169, 00150813150814, 00150813150857, 00150813150859, 00150813150860, 00150813150861, 00150813150864, 00150813150865, 00150813150867, 00150813150868, 00150813150869, 00150813150870, 00150813150871, 00150813150872, 00150813150873, 00150813150874.
	3 rd Semester Repeater	NCVT	00140813000063, 00140813000064, 00140813000065, 00140813000067, 00140813000068, 00140813000097, 00140813000101.
	4 th Semester Repeater	NCVT	00140813000088, 00140813000089, 00140813000097, 00140813000101.
4 th Semester Repeater	SCVT	Km- 107R1, 109R1	
2. Mokokchung	1 st Semester	NCVT	00160813000001, 00160813000002, 00160813000003, 00160813000004, 00160813000005, 00160813000006, 00160813000007, 00160813000008, 00160813000009, 00160813000010, 00160813000011, 00160813000013, 00160813000018, 00160813000019, 00160813000020, 00160813000021.
	3 rd Semester Repeater	SCVT	Ts- 03R1, 14R1, 15R1, 16R1, 18R1, 19R1, 21R1, 23R1, 26R1, 29R1, 31R1, 32R1, 34R1.
3. Tuensang	Conventional	SCVT	Ts- 03R1, 14R1, 15R1, 16R1, 18R1, 19R1, 21R1, 23R1, 26R1, 29R1, 31R1, 32R1, 34R1.
	3 rd Semester Repeater	SCVT	Ts- 41R2, 42R2.

Result With held:
The following Roll Numbers are held up due to non-received of result from the Ministry:
Semester-II: 00150813150850 – Mechanic Diesel.
00150813150885 – Welder.

Total appeared : 258
Total passed : 154
Passed % : 59.69%

Note:

- Marksheet, etc, will be issued from respective ITI w.e.f 30/06/2017 for passed candidates.
- NCVT exam for failed candidates will start from 18/07/2017. Therefore candidates are requested to fill up the forms on or before 27/06/2017
- SCVT exam for failed candidates are requested to fill up the forms on or before 30/06/2017.
- For detail information candidates may contact their respective Govt.ITI.

(MUTHINGNYUBA SANGTAM)
Director
Employment, Skill Development & Entrepreneurship
Nagaland, Kohima
Issued by: DIPR

**GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA**

NO.DET-12/37/16 /187

Dated Kohima, the 17th June'2017

ADVERTISEMENT

The Department of Employment, Skill Development & Entrepreneurship announces a walk-in interview for engagement of Aspiration Mapping Officer's to conduct the Aspiration Mapping Survey for a period of 30 days from the date of engagement.

Sl.No	Name of the Post	Name of the District	Name of Blocks	No. of Post	Venue for interview	Date of interview
1	Aspiration Mapping Officer's (AMOs)	Kohima	SechU-Zubza	1	Regional Employment Exchange, Kohima	30-06-2017
			Kohima	1		
			Botsa	1		
			Chiephobozou	2		
			Chunlikha	1		
		Tseminyu	2			
		Jakhama	1	District Employment Exchange, Dimapur	30-06-2017	
		Dhansiripar	2			
		Medziphema	2			
		Chumukedima	2			
		Kuhuboto	2			
		Niuland	1	District Employment Exchange, Wokha	30-06-2017	
		Aghunaqa	2			
		Changpang	2			
		Bhandari	2			
		Sanis	2			
		Ralan	1	District Employment Exchange, Phek	30-06-2017	
		Wozhuro	2			
		Chukitong	1			
		Wokha	1			
		Meluri	1			
		Weziho	1	District Employment Exchange, Zunheboto	04-07-2017	
		Pfutsero	1			
		Chizami	1			
		Phek	1			
		Sekruzou	1			
		Kikrumba	1	District Employment Exchange, Tuensang	04-07-2017	
		Chetheba	1			
		Akuhaito	1			
		Akuluto	1			
		Satoi	1			
		Satakha	1	District Employment Exchange, Mokokchung	30-06-2017	
		Tokiye	1			
		Ghathashi	2			
		Suruhotu	1			
		Zunheboto	1			
		Chare	1	District Employment Exchange, Mon	30-06-2017	
		Chessore	1			
		Longkhim	1			
		Noksen	1			
		Noklak	2			
		Panso	1	Rural Employment Bureau, Peren	30-06-2017	
		Sangsangyu	2			
		Shamator	1			
		Thonoknyu	1			
		Chuchuyimlang	1			Deputy Commissioner Office, Longleng
		Changtongya	1			
		Tuli	1			
		Mangkolemba	1			
		Tsurangkong	1			
		Kubolong	1	Rural Employment Bureau, Kiphiri	30-06-2017	
		Longchem	2			
		Ongpangkong(N)	1			
		Ongpangkong(S)	1			
		Chen	1			
		Aboi	1	Rural Employment Bureau, Kiphiri	30-06-2017	
		Angjiangyang	1			
		Tobu	2			
		Mon	2			
		Phomching	1			
		Tizit	2	Rural Employment Bureau, Kiphiri	30-06-2017	
		Wakching	2			
		Jalukie	2			
		Athibung	2			
		Peren	1			
		Tenning	2	Rural Employment Bureau, Kiphiri	30-06-2017	
		Sakshi	2			
		Longleng	2			
		Tamlu	1			
		Kiphire	2			
		Longmatra	1	Rural Employment Bureau, Kiphiri	30-06-2017	
		Pungro	2			
		Sitimi	2			
		Khongsa	2			

Terms and Conditions:

- Honorarium: Rs.15,000 /- (@ Rs. 500/- per day).
- Engagement is purely for the Survey period (30 days).
- Eligibility Criteria:**
 - He / She should be a resident of the concerned block.
 - He/ She should be a graduate with Computer Knowledge.
 - He / She should have a valid Employment Exchange Registration Card / Indigenous Certificate.
 - He / She should have a thorough knowledge of the village / RD Blocks in the district.
 - He / She should have the willingness to travel to all assigned villages under each block for Data collection.

NOTE:

- Applicants are to walk in for interview to the respective District Employment Exchanges / Rural Employment Bureau Kiphiri / Peren and office of the Deputy Commissioner, Longleng (for Longleng Candidates) along with the original documents.
- Interested Candidates can come for interview as per the interview schedule given above from 10.00 AM onwards.

(MUTHINGNYUBA SANGTAM)**Director****Employment, Skill Development & Entrepreneurship
Nagalnd, Kohima.****Issued by: DIPR****SANGDONGER**

Ozü jabaso asüba anogo 1/3/17 nung senmangertemji kü kinungpu Late Mr. Alemba tedi tambusang Mr. Noksembo Japu, par jabaso asem, par adianu ana parnok trok jagi senmang meshi. Anungji Nok nü aser prangpong ajak agütsü. Nia Govt. servant inyaka liasüji kü kinungpu küna sentepa aliba ali kimung takaba ajak parnok meshia agiogo. Shirnoki özü kimungtemji sayu parnok nema ali agütsü. Senmangertemji ni tang alidak ki toktsü aser parnok item ya agi: (1) Residential House - 1 (2) Pasha type House - 1 (3) Building House - 2 R.C.C

Aser tebei tebang agi ashir, par jabaso kati züludaktsü ajisür par jabaso ajaki sign sädaktsü. Par apanger shinga paper nungji sign mesüdaktsü, özü yimer ana nema sign sädaktsü. Parnoki ashi, yamala shity nung tetsür nem sign mesüdaktsür aser yamala ya tetsüri mayur. Iba shityji parnok mapa matem tashi miima yur meshiyonga magütsü, tesülen ita pezü buba 5th June 2017 nung dang onok nem agütsü. Senmang atemer, külakzüka rongsen takaba ajak rakzüka bener aoba ya asen yimer lanurtem yamaibo tarutsü nung iba yimya tereprangzükma ta ni ashir.

Mrs. Yashila, Dimapur**OFFICE OF THE****VILLAGE COUNCIL LAKHUNI**

P.O Mangkolemba, BPO - Alongtaki, Dist - Mokokchung, Nagaland

METETDAKTSÜR**To****Shri. Noksangluba, Lakhuni**

26th June 2017 nung na village council court Lakhuni nung 7:00 PM shitak nung arua report süang, tashi mangara sobaliba nung aliba ama inyaktsü.

Sd/-

**Mr. Tekatemsü Langu,
Secretary,
Village Council Lakhuni.**

Sd/-

**Mr. Lanuyanger Langu,
Chairman,
Village Council Lakhuni.**

ELITE HEALTHCARE TRAINING INSTITUTE

Dimapur - 797112, Nagaland

ADMISSIONS GOING ON

Courses offered	Eligibility	Duration
FHW (Female Health Worker) ANM	10 th Passed	2 Years
DHAI/ Nursing Assistant	8 th Passed	1 Year
CENTRE-I		
Dhobinallah Culvert, Near ICICI Bank.	CENTRE-II	
M.No: 9856125245/ 9615694009	4th Mile Near Agri Expo Junction	
Office Timing: 9 AM - 1 PM (Monday to Friday)		

**GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT &
ENTREPRENEURSHIP
NAGALAND : KOHIMA.
ADVERTISEMENT**

Dated Kohima, the 17th June'2017

NO.DET-2/14/2001(Pt): In partial modification to our Advertisement No.DET-2/14/2001(Pt-I) dated 9th June'2017, the Recruitment Drive for Cabin Crew (only Female) and Airport Operations & Customer Service Officers (Male/Female) Indigo Airlines has been rescheduled as below:

Interview Dates:

Kohima : 20th June' 2017	Dimapur : 21st June' 2017
Venue : Multipurpose Hall, Directorate of Employment, Skill Development & Entrepreneurship High School Road, Kohima	Symbios Creation Pvt. Ltd., IT Complex, (Opposite Town Hall), Nagarjan Junction, Dimapur
Time : 10 AM onwards	Time : 10 AM onwards.

All other conditions remains the same.

Note:- Candidates who have not applied can also walk-in for the interview with their resume and educational qualification documents along with 4 passport size photos, 2 full length photos, passport & other ID proof for both Kohima & Dimapur venue.

For information & clarification:

Contact No:- (1) 09830051555 (Emporium Training)
(2) 9436062368 (State Govt.)

(MUTHINGNYUBA SANGTAM)**Director****Employment, Skill Development & Entrepreneurship
Nagalnd, Kohima.****Issued by: DIPR****ENPO aser NTC-i asür... (Tapak 1 nungi..)**

Pa asübaji South East Asia jembidang, "NTC-i asür nung pei maitsü atema Khapläng ji tebedi ka ama aser rarartem atema takoksa tulu Naga nunger rongnung lir. Tsükchirtemibo paji tebilemba abenba senso tajung kiralongrar ka ama züngshi ka ama akhümtsübur. Pai saka Naga nunger aser tangar asenok nem teti bilemtettsü aika atema, paji 'hero' ka aser indang senmang tajung ka linük meimer ka züngshir. Pei yutsür ogo" ta metetdaksü. maitsü aser linüktem atema Iba sentong nung ENPO inyakba nisungtemi pa tir, Khoiwang Konyak, lenisüba akhümtsübuu aruogo, CNTC nungi RC Ovung aser ta NNPGs Working Group, Nagaland GB Federation, tir convenor-isa metetdaksü. Shalem Konyak NTC Advisor, Z Lohe-ia o nungertemia o jembii.

Pakistan den final nung India nung asayartem kasa dang asayatsü



June 17, 2017 nü The Oval nung India captain Virat Kohli aser Pakistan captain Sarfraz Ahmed nati takok marok amer agiba noksa ka angur.

London, June 17 Deobarnü Pakistan den masaya (Agencies): ICC Champions Trophy final Oval nung Virat Kohli-i India nung

asayartem memelenshitsu ta metetdaksüogo.

Taoba asaya nung all-rounder Hardik Pandya-i ball aonba mapang Bangladesh nung Tamim Iqbal aser Mushfiqur Rahim nati run aika nguteta liasü, saka Kholi-i pa ya ajak nung ajak asayar ka ta shia team nungi metugudaksüi pusemogo.

Tang tashi nung India aser Pakistan na International Cricket Council (ICC) tournament nung 16 ben asayaa lir aser India-i 14 ben tashi koka lir.

India aser Pakistan na tsüingda asaya ya ajaki repringner aser Deobarnü asayatsü aliba asaya yaa kanga jangratemtsüka asütsü imlar.

Küm 3 anünga lia McDonald-i Olympic Sponsorship tembangogo

June 17, 2017: U.S. fast-food giant, McDonald-i küm 41 tashi International Olympic Committee (IOC) den official sponsorship inyakba sülen küm asem lia tezüngzüktep tembangogo, ta IOC-i metetdaksü.

1976 küm nungi tenzuka Mc Donald-i sponsor süa arur aser IOC indang top sponsors programme nung shilem agia aru, aser parnoki Olympic Games atema küm pezü shia sen US sen billion ka dak tema agüja arur. Iba tezüngzüktepji 2020 küm tashi aser Tokyo

summer Olympics tashi liasü. IOC Television and Marketing Services Managing Director, Timmo Lumme-i sangdong ka ajanga, "Shiushilembaba nung kanga temelenshi aliba tanü ama putu ka nung, McDonald-i tanga business nung tongtibangsüa rangloker südi ta onoki angateter," ta metetdaksü.

"Item kuli nung ajemdaker McDonald den onok pilatsü atema onoki mulungogo," ta paisa ashi.

McDonald Global Chief

Marketing Officer, Silvia Lagnado-ia, "Aliba nung onoki business ainba dak sendakba nung onoki onok shishilembaba lenla ajaklen asadanga tanga nungdakter nung rangloksü atema onoki IOC den amalitepa iba telemtetba agi," ta metetdaksü.

McDonald-i mezüing 1968 küm Olympic Games nung shilem agia densema liasü. McDonald-i iba contract tembangaka parnoki maneni sangküm Pyeongchang winter Olympics nung sponsor shilem agitsü.

Confederations Cup atema Russia renema lir

Saint Petersburg, June 17 (Agencies): 2018 World Cup atema tetendangba ka ama Honibarnü nungi Russia nung 'hooliganism' aser 'security' dak sendakba nung tebilemstü liaka Confederations Cup tenzüksü.

Iba asayamong nung World Cup akoker Germany telok densema telok 6-i shilem agitsü aser iba ajanga asaya repringnsüpurtem aika yimti nung sentepsü, anungji Russia nung atema item raliwalirtem aser lisopurtem azüoktsüba nung parnok tashi tendangba mapang ka asütsü.

Taruba küm World Cup yimti 11 nung stadium 12 nung asayatsü aser ietm yimti tem rongnung Moscow, St. Petersburg, Kazan aser Sochi densema lir.

Honibarnü Group A aser Oceania champions New

Zealand na tsüingda Saint Petersburg, Krestovsky Stadium nung asayaba mapang President Vladimir Putin arua adentsü.

Krestovsky Stadium asüba nung mepetmesü aika adokogo aser item taitüsüba aser mepetmesü liaka küm 10 shi agia iba stadium ya yangluogo. Iba stadium ya yanglutsü asoshi sen \$800 indoktsü ta asateta liasü.

Yaküm iba ground tendanga asayaba nung raksaadok aser iba melena tang aritepa pitch tasen ka yangluogo, saka sentong ayongertemi ashiba agi, iba ground ya asayatsü asoshi temsüa lir.

"Onok iba asayamong atema renema lir. Infrastructure, hotel, transportation system ajak renema lir aser iba asyamong mapang kecha lendong

matalokdaksütsü asoshi kanga junga renema lir. Russia-i nenok pelashishia jaoker," ta Russia deputy Prime Minister Vitaly Mutko-i ashi.

FIFA Secretary General Fatma Samoura-i ashiba agi, parnoki imlaba dang nung tali Russia nung renemshir lir.

"Onoki Moscow aser St Petersburg stadium semdangogo aser parnok kanga junga renema lir aser asayamong tajung rongnung iba ya ka asütsü ta imlaa atati," ta FIFA ketdangseri ashi.

Groupe A nung tanga team anaji Cristiano Ronaldo-i anir European champions Portugal aser CONCACAF team Mexico ta alitsü.

Groupe B nung Germany, Asian Cup champion Australia den asayatsü aser Africa Cup of Nations winners Cameroon o Copa America champion Chile na asayatsü.

Hindu convention nung 'Hindu Rashtra' ... (Tapak 1 nungi)

"Item wadangtem mulunga agizükogo" ta paisa merüktetba aser ochimashi agienba den loktiliba asoshi mapa inyaktsü tenzükba sülen ang Hindu Rashtra tentetsü lenmang lapoktsü. Hindu pusemer telok ajaki iba onük


shisem.

Pingale-isa ashiba agi, Hindu nung telok ajaki linük aser tamangba yimsü kümzüka ayutsü atema longjemer inyaktsü

tenangzükba agi.

Külen, Talangana nungi BJP MLA, T Raja Singh-i "nashi tepsetba nokdangtsü atema BJP-i telemtetba agitsüla" ta osangbenertem dang ashi.

Heavyweight Boxer Deontay Wilder-i ganja bena lia apu



Alabama, June 17, 2017 (Agencies): Brihostibarnü Heavyweight boxing champion, Deontay Wilder ket nung ganja

benaliba atema Tuscaloosa police-i pa puogo, ta osang ka ajanga metetdaksü.

Bodhbarnü Wilder indang gari kichiba ozüing alema tanak asüba agi police-i gariji sot, iba mapang nungji police ketdangsertemi pa meyong Cadillac Escalade gari nungji ganja menemet, ta police-i ashi.

"Ketdangsertemi gari telung nung alibatem bushitsü atema o ajanga temelaba meshi, iba sülen gari telung nungji ganja tera angu," ta Tuscaloosa Police Department-i sangdong ka nung metetdaksü.

America nung arishi küm 31 tain, Wilder-i taküm February ita nung Gerald Washington den tsüingtepa pongububa round nung knockout agi takok ngua maneni pa indang WBC heavyweight title ngua liasü.

Pa ket nung ganja aliba

atema police-i pa apuba sülen pai US sen 1,000 agüja bail nung chiok.

Phone ajanga osangbener den jembidang Wilder atema okatsür, Paul Patterson-i, "Ganja ji Wilder meyong masü. Wilder anogo aika state nung maliasü, pa Rolls Royce gari nung Georgia nungi kidangi meyipa aruba sülen nungdak kar atema pai Cadillac Escalade melena amshi," ta ashi.

Wilder meyong gari aika lir, aser itemji par medemertemia amshir, ta Patterson-isa ashi.

"Wilder-ia ganjaji pa meyong masü, anungji pa tenüing tajung meraksatsü atema pai inyaktsü ta shiogo," ta Patterson-isa ashi.

"Temesepba mozü balala amshiba ken o nung pa nem kodanga tai metongloksüidang. Pai iba ya süoki ia agir. Nüburtem atema paji tatishitsü tajung agir ka ta pai bilemer. Pa bendanglen alidang shibai pa indang gari amshiar ibaji onoki bushisüingdangdar," ta paisa metetdaksü.

Kohima DC-i Officers... (Tapak 1 nungi)

Tanga telok aser kiyongtemia iba mapa tajung ajizüka inyaka aotsü imlar aser Kohima ya planned City ka kumdaksütsü atema inyaktsü ayongzükter, ta Soundararajan-isa shisem.

Iba mapatong atema team leader Yanpvuo Kikon-i o jembidang ashiba agi, iba ajanga nisungtem talidak melamela ngutettsü aser city planning o administration nunga teyari angutsü.

Iba ajanga postman, courier companies, taxis, citizens, tourists temi parnok indang mobile phones aser apps amshia address mashii kati otettsü, ta paisa ashi.

'Smart Colony: GIS and 3D Map' ajanga Officers Hill aser Kohima nung Smart Colony tem kumdaksütsü. Iba ya Nagaland nung mezüingbuba lir aser tang nungi House Number mesüra Google ID mesüra House Owner's name ajanga home delivery melamela sütettsü. M a n e n i www.nagalandaddress.in website nung ki melamela angutsü, ta Kikon-isa metetdaksü.

Nagaland nung geocoded postal addressing system ji Nagaland State Address Geoportal System with GIS & remote Sensing Center, Nagaland ajanga inyaker.

BILEM DANGANG

"Nai repringba ji tongtibang masü, nai anguba ji tongtibang".